

古今姓氏書辨證

欽定四庫全書提要

古今姓氏書辯證四十卷宋鄧名世撰而其子椿裒次之名世字元亞臨川人祖孝甫見宋史隱逸傳卽原序所稱文昌先生者是也椿有畫繼已著錄李心傳繫年要錄稱紹興三年十月詔撫州進士鄧名世赴行在以御史劉大中薦也四年三月乙亥上此書時吏部尙書胡松年以其貫穿羣書用心刻苦遂引對命爲右迪功郎王應麟玉海所載亦同惟言名世初以草澤得名上書後始詔賜出身充史館校勘朱子語類又謂其以趙汝愚薦以白衣起爲著作郎後忤秦檜勒停均與心傳所記不同則未詳孰是耳文獻通考宋藝文志俱作四

十卷惟宋會要作十四卷中興書目作十二卷殆傳寫之訛其書長於辨論大抵以左傳國語爲主自風俗通以下各采其是者從之而於元和姓纂抉摘獨詳又以熙寧姓纂宋百官公卿家譜二書互爲叅校亦往往足補史傳之闕蓋始於政宣而成於紹興之中年父子相繼以就是編故較他姓氏書特爲精核朱子語類謂名世學甚博姓氏一部考證甚詳不虛也後椿作畫繼亦號賅洽殆承其討論之餘緒乎宋時紹興有刊本今已散佚永樂大典散附千家姓下已非舊第惟考王應麟所引原序稱始於國姓餘分四聲則其體例與元和姓纂相同今亦以韻隸姓重爲編輯仍釐爲四十卷目錄

二卷其複姓則以首字爲主附見於各韻之後間有徵引訛謬者併附著案語各爲糾正焉

原序二首

天下有不可不學者有終身不必學者道德仁義君子之所學也詩書禮樂君子之所學也天文地理陰陽卜筮之書雖不可不學亦不必學知之則近於星翁厯官不知不害爲君子然而君子之於天下所以耻一物之不知者誠亦有用焉爾是故學者必自致知格物始一物不格焉非所謂善學也古之君子所以大過人者無他焉下學而上達無理事精粗之別而已若夫姓氏之書是亦君子之所不可不學也何則因生賜姓胙土受氏其來尙矣世次旣遠茫昧懔恍幾若不可窮究然而以今觀往古古亦猶今也以古觀後世今亦猶古也吾心造太極太極造天地古亦非今

○案此句上下俱當有脫文

皆

自我而觀之何物不可知何事不可學何道不可備而況於天文地理乎而況於姓氏之書乎裴總角讀書旁搜博採實有志於此而學校驅之科舉汨之志卒不遂爲之長太息者屢矣臨川鄧氏元亞以絕人之資邁往之氣於書無所不觀於事無所不學自幼挾策一覽無遺以故淹通文史馳騁貫穿上下數千載間猶滄溟巨浸不可涯涘詩書之外尤深於春秋論議反覆皆有證據亶亶可聽使人忘倦又推其餘力作古今姓氏書辯證數百十萬言參訂得失無一字無來處是誠古人之用心也一日攜以過裴俾爲序冠諸編首裴曰此書已成一家言矣尙何待不腆之文表見於世愧非肉譜不得是正姑論其不可不學者書於卷末元亞文昌先生之

孫舊名命世棐爲更其一字曰名世云宣和六年閏三月二十七日武陽高棐書

先君太史公生平留意姓氏之學雖飲食夢寐弗置也尤喜稱道名公卿大夫家人物之盛勲業之懿以詔子弟故古今姓氏書辯證凡三本焉其五卷者成書於宣政之間時諱學史方貧賤中無書檢閱闕文甚多其十四卷者後稍銓次增補之蓋成書於建炎之初是時晦迹窮山攜幼避地無虛辰昨給禮上于法宮者是也然居懷未滿之意其後蒙恩備數太史之屬者八年始盡得銓曹命官脚色冊烏府班簿隲括次序之稍稍備矣紹興辛酉冬放歸山樊家書稍備曾韓衢州美成同寓臨川借其家藏熙寧姓纂宋百官公卿家譜稽

考參訂之及將易簀謂椿年曰姓氏未成全書死不瞑目椿
年泣奉以周旋罔敢失墜既卒哭奉門人吳曾狀如浮梁乞
銘于侍讀尙書程公公見椿年慟哭首問遺書手澤所在椿
年具以實對公歎曰子能嗣先君之志吾亡友有子可賀門
戶其庶幾乎別未數月又以書來趣曰子讀禮之暇不宜墜
先志姓氏宜亟成書遷延歲月則編纂創亂難記憶矣宜速
俾老夫一觀椿年既得是語乃盡哀手澤遺編斷藁又取宋
名公文集行狀墓志訂證次序之釐爲四十卷卽此本也椿
年孤陋寡聞貧病不偶幸不墜先志者尙書公賜也謹再拜
書諸卷末以告當代好古博雅君子焉乾道四年三月朔牛
馬走椿年謹書

序曰春秋時善論姓氏者魯有衆仲晉有胥臣鄭有行人子羽皆能探討本源自炎黃而下如指諸掌專取左氏國語

爲主參以五經子史之文自風俗通以來

如姓苑百家譜姓纂

凡有所

長盡用其說穿鑿訛謬必辨駁之始於國姓餘分四聲終於漢姓蕃姓補遺凡四十卷復以熙寧姓纂皇朝百官公卿家譜參訂書始於政宣而成於紹興之中年名世子椿年裒集次序之其書始備唐宰相表九十三族至鍾陳韓高之氏亦有訛舛姓纂稍能是正數十條而齊秦之屬亦所未暇至鉏邱茅夷指爲複姓又不勝其謬矣

○案今本闕原序以上据玉海五十錄補

古今姓氏書辨證目錄卷

上平聲

一東

東

同桐

蟲冲終

衆

樂壽城

戎戎弓

宮融彤

熊馮荒風

風豐豐豐倖充公功蒙紅鴻

叢翁醴蓬

東郭東里東宮東門東陵東關東方

東閭東鄉東陽東丹東野東萊同

蹄同官桐里桐門銅鞮中行中央

中英中梁中叔中壘終葵終古戎子

弓里 宮孫 熊相 熊率 空桐 空桑 空

相 公冶 公乘 公孫 公西 公叔 公子

公羊 公析 公劉 公肩 公牛 公師 公旗

公右 公巫 公仲 公檣 公族 公孟 公

他 公玉 公泥 公綦 公舌 公帥 公甲

公明 公歛 公上 公山 公罔 公齊 公牽

公仇 公幹 公之 公勝 公城 公若 公

緒 公儀 公皙 公輸 公正 公思 公襄

公戶 公慎 公房 公車 公言 公金 公獻

公息 公留 公朱 公旅 公冉 工師 工

婁 紅陽 驪夷

二冬

冬 佟儂宗

彤魚宗伯宗正

三鍾

鍾 龍庸雍重從蹤縱恭龔

共

鍾離鍾吾龍正封人封父雍人雍正

逢公逢孫逢侯逢正

四江

江 厖邦龐逢

五支

支移爲媯隨奇岐義宜儀
皮蕃兒離驪訾卑裨諱鄆
施彌池眭危

支離蛇正隨巢奇斤戲陽崎正訾陬
施屠斯引彌且彌牟

六脂

脂夷師資飢茨尸耆伊羽
追惟遺纍嫫夔騅誰

夷陽夷門師宜師延毗沙鷗夷茨花
祁夜伊耆伊力葵正

七之

厨人 邾婁

十一模

瓠

孤竹 徒人 徒何 菟裘 菟賴

十二齊

齊院 提奚 邠兒 犀梯 泥鮭

洼畦 蜀毒 聖倭

西周 西郭 西方 西河 西乞 西陵 西樓

西門 西宮 西王 西鄉 西都 西閭 西

素

奚計盧

十三佳

媧柴娃

鮭陽

十四皆

懷淮

十五灰

惺回槐枚梅雷頽崔裴枯

十六哈

哀來萊邾檣台邵斂

十七真

真甄因闐新辛辰仁人申

鄰鱗陳秦蟻邠

真人因孫新垣新孫新和辛廖申公

申叔申鮮申章申屠

十八諄

荀郇淳倫

淳于

十九臻

莘嬖詵

二十文

文雲斌云邠員君軍芬紛

聞人軍車

二十一欣

訢勤

勤宿

二十二元

元原袁爰垣轅棧樊言

原伯原仲軒轅軒正

二十三魂

渾昆溫門孫敦俚盆賁

昆吾溫稽孫陽屯渾奔水

二十四痕

恩

根牟 根水

二十五寒

寒、韓 單丹安難但邗蘭刊
韓餘 韓侯 韓褐 邯鄲 安止 安國 安陵
安是 安都 安遲 蘭喬

二十六桓

桓官 觀冠 樂謹 斂瞞 潘革
完顏

二十七刪

關環 班蠻 顏

關龍 馱臂

二十八山

山間藺瞞

下平聲

一先

先阡天賢弦燕田顛牽淵

邊縣

先穀先賢千乘涓濁

二仙

鮮錢然延連偏便綿全泉

宣翺船顓歛貝虔騫權拳

鄢嬌

鮮于 鮮陽 鮮虞 延陵 延州 宣于 顓臾

顓孫 顓頊 孿鞮 焉耆

三蕭

蕭 貂 刁 凋 條 調 聊 遼 堯 鄒

四宵

蛸 朝 晁 朝 囂 譙 焦 椒 饒 搖

繇 鉋 姚 搖 韶 昭 招 苗 要 喬

橋 僑

朝臣 昭涉 昭武

僑陳如

五肴

淡巢茅苞苞蔗

茅夷

六豪

高阜勞牢毛襄陶桃敖曹

皐落饗饗陶止陶叔曹牟曹止

七歌

柯多佗羅那何阿

柯祇多蘭羅侯何柰荷訾阿跌阿熱

阿每阿那阿賀阿伏

多覽葛佗駱拔阿伏干阿鹿桓阿史那

阿史德阿逸多阿鹿孤

八戈

戈過繁番和禾科

婆衍磨離波斯和拔和稽

九麻

車蛇瓜花家瓊巴沙牙衙

茶余杷查櫨

車非車焜車遽車成蛇工華原霞露

瓊工瓊呂沙陀沙陀余工

十陽

陽楊揚羊洋良涼香鄉商
房防章昌羌姜長張方襄

相將莊嘗常霜匡王芳狂
陽成陽正楊孫羊舌羊角梁垣梁餘
梁于梁石商止商密房當防風章
仇羌憲羌止羌師長勺長盧長魚
長狄長吾相里將閭將軍將梁將其
王史王孫王叔王官王子王人

十一唐

唐棠郎琅狼倉蒼剛桑喪
康荒鄺黃皇湯汪芒臧囊
印

唐溪唐山唐孫堂邑棠谿當塗蒼林

桑上 桑扈 皇甫 皇子 湯滂 臧會 臧

文

十二庚

更彭 英平 荆明 鳴榮 卿黥
行衡

彭祖 平林 平寧 平陵 京城 京相 榮錡
榮叔 行人

十三耕

閔 訇 萌

十四清

清 羸 鄧 營 嬰 成 邴 程 并

精縱 嬰齊 成公 成陽 并官

十五青

青經 邢涇 丁星 靈泠 冷冥 鉞

青史 青陽 青牛 青鳥 經孫 邢莫 形成

涇陽 丁若 泠淪 泠州

十六蒸

承陵 凌應 乘勝 仍徵 繪鄒

陵陽 勝屠

十七登

登曾 備弘 滕

滕叔

十八尤

郵鄭劉留樛秋猷游遊牛

脩周州舟犖止鄒聊騶稠

裘仇求牟

取慮由吾由余游梓游水游棣修魚

周生周陽讐子止敦止林鄒屠仇

由牟孫

十九侯

侯歐謳區樓婁緱句鉤鯁

哀

侯岡 歐陽 歐侯 樓季 鉤勿 投壺 鉤弋

句龍

侯莫陳 投和羅

二十一侵

侵尋 鐔鄩 鄩颯 潏臨 綈斟 箴

蒧湛 湛任 禽金 陰參 葭岑

斟灌 斟戈 沈猶

二十二覃

覃譚 南男 堪

南郭 南宮 南史 南鄉 南榮

二十三談

談郊甘爍僭聃

澹臺甘先甘莊三州三飯三伉三種

二十四鹽

鹽閭廉詹占苦淹潛黔鍼

瞻葛箝耳黔婁鍼巫

二十五添

謙兼

二十六咸

咸函

咸邱函輿函洽函谷

二十八嚴

嚴

二十九凡

凡閣

古今姓氏書辯證卷一

四庫全書原本

守山閣叢書 子部

宋鄧名世撰

金山錢熙祚錫之校

上平聲

一東

東

謹按中國有東西南北高麗有北氏必其先皆以方爲氏
同

姓書舊無同氏唯千姓編曰前涼錄有同善謹按秦漢間
已有此氏必周官典同之後或以官氏而應劭何承天未
之考也前漢書蕭相國子祿薨無嗣高后封何夫人同爲
鄧侯然則蕭何夫人宜爲同氏矣古者史書婦人必以姓

故詩稱孟姜孟庸孟弋齊之姜宋之子而春秋書徐嬴王姬蔡姬皆以國協外夫人之姓定姒文姜成風皆以謚協內夫人之姓伯姬叔姬季姜皆以字協內女之姓司馬遷班固取法於此故蕭何夫人同氏霍光夫人顯卽顯氏其變例書名者亦先以姓如樊噲娶呂須是也韋昭國語註曰桀妹喜紂姐已周褒姒喜已姒姓宋祁作唐史載王珪母李鄭果母崔而不言氏皆古史法也顏師古漢書註獨以後若等爲名自是學者頗惑其說然不足爲據當從詩春秋班固韋宋爲是

桐

神仙傳有桐君白日昇天謹按桐氏出自春秋桐國之後

魯定公二年楚滅桐子孫以國爲氏其地漢桐鄉今舒州桐城是也

蟲

出自春秋時邾國蟲邑魯昭公十九年宋圍蟲取之其大夫以邑爲氏漢功臣表有曲城侯蟲達子捷孫皇柔皆嗣侯立孫宣爲公乘詔復其家

沖

邵思姓解曰風俗通漢有博士沖和

終

何文通姓苑曰出自顓帝裔孫陸終其後以王父字爲氏謹按漢有諫議大夫終軍王莽天鳳三年有校尉史終帶

亡入匈奴宋有殿中丞終世勣

衆

出自姬姓魯孝公生子益師字衆父其孫仲以王父字爲氏春秋衆氏音中舊姓書皆作去聲誤矣

崇

唐虞之際封鯀于崇謂之崇伯舜殛鯀于羽山以其國更封諸侯至商末崇侯虎譖西伯於紂紂囚西伯已而許其專征西伯遂伐崇降之周初遷其重器以分同姓明堂位所謂崇鼎天子之寶器是也崇侯旣滅子孫以國爲氏

嵩

舊說風俗通有嵩極立子誤矣謹按西京雜記漢成帝時

有安定嵩真與玄菟曹元理並明算術真嘗自算其壽七
十三綏和元年正月二十五日晡時死書其壁以記之至
二十四日晡時死其妻曰見真算時長下一算欲以告之
虛說有旨案西京雜記作慮脫有旨此誤故不敢言今果較後一日真又
曰北中青龍上孤檣之西四丈所鑿之入七尺吾欲葬此
地及真死依言往掘得古時空槨卽以葬焉詳此卽漢有
嵩氏而風俗通考之未精也

娥

古諸侯有娥氏以國爲姓卽契母簡狄之國

戎

出自姜姓四嶽之後別爲允姓先王居橐杻于四裔故允

姓之戎居于瓜州春秋時秦人貪其土地追逐諸戎戎子
吾離附于晉晉惠公封以南鄙之田謂之姜戎自吾離至
駒支常爲晉附庸其族戎津仕晉爲車右大夫始以國氏
漢功臣表柳丘齊侯戎賜以都尉破項籍功封賜子安國
生恭侯嘉嘉生角皆嗣至立孫長安公士先生宣帝詔復
其家又宣帝戎婕妤生中山哀王唐虔州刺史戎昱岐州
人有詩名初舉進士京兆尹李鑾欲妻以女使改姓昱貽
詩曰千金未必能移姓乃止甚矣鑾之陋也昔衛莊公蒯
賁登城以望戎州怒曰我姬姓也何戎之有焉剪之其後
卒死于戎州已氏夫地名人姓謂之戎何害莊公李鑾不
可謂知所惡也

戎

元和姓纂曰春秋有戎律誤矣晉襄公車右大夫乃戎津

也

案左傳文公七年晉及秦戰于令狐戎津爲右晉襄公卒于魯文公六年立靈公此襄公應作靈公

今詳

唐孔至姓氏雜錄有代北茂眷氏

案原本作茂眷氏據去聲五十侯茂氏條複

姓茂眷氏條引改

改爲茂氏茂當爲戎必字畫之誤也

案廣韻一東引後

魏官氏志作戎眷氏改爲戎氏今本官氏志作茂與雜錄同

弓

後漢初安陵人弓林與方望同立孺子嬰爲帝晉有江夏

太守弓欽

宮

出自周官掌宮門者以世官爲氏

融

謹按春秋外傳顓帝裔孫曰黎爲高辛氏火正寔能光融天下以功大故號祝融後人氏焉

彤

元和姓纂曰本彤氏周卿士彤伯之後裔孫避難改焉

熊

出自芊姓祝融曾孫

○案曾疑當作裔

鬻熊爲周文王師其子事

文王早卒曾孫熊繹以王父字爲氏成王封爲荊子後僭

號楚王由繹而下爲楚君者皆以熊連名稱之如熊通熊

虔熊居之類蓋姓芊而氏熊也春秋時楚公族有熊負羈

熊宜僚爲大夫而近楚羅國亦爲熊姓今望出江陵

馮

戰國策馮亭爲韓守上黨秦攻上黨絕太行道韓不能守
馮亭乃入上黨於趙遂爲上黨潞人趙封亭華陽君與趙
括拒秦戰死長平宗族由是分散或留潞或在趙在趙者
爲官帥將官帥將之子爲代相及秦滅六國而馮亭之後
馮母擇馮去疾馮劫皆爲將相焉漢興功臣馮敬卽母擇
子而文帝時馮唐顯名卽代相子唐弟騫自上黨徙杜陵
至武帝時馮奉世字子明以良家子選爲郎厯事昭宣爲
左將軍光祿勳賜爵關內侯其長女爲元帝昭儀生中山
孝王卽中山太后媛也奉世子男九人譚野王遂立皆至
大官所謂大馮君小馮君者裔孫衍後漢有傳又馮魴字

孝孫南陽湖陽人亦云其先魏之支別食采馮城因氏焉
秦滅魏遷于湖陽爲郡著姓東觀記亦曰魏之別封曰華
侯華侯孫長卿食采馮城因以爲氏又馮勤字偉伯魏郡
繁陽人曾祖父揚宣帝時宏農太守八子皆爲二千石趙
魏間榮之號萬石君兄弟形皆偉壯唯勤祖父偃長不滿
七尺乃爲子伉娶長妻生勤長樂信都馮氏馮和生安慕
容永時爲將軍子跋徙居龍和家于長谷仕慕容氏爲中
衛將軍及慕容雲之亂乘隙篡位國號北燕在位十一年
死二子翼永跋幼弟宏殺翼自立爲魏所伐奔高句麗殺
之弘兄素弗侍中車騎大將軍錄尚書事跋從兄萬泥驃
驍大將軍幽平二州牧務銀提爲上大將軍遼東太守買

衛尉城陽伯曙太常高城伯族人懿給事中南燕有京兆
太守馮騫上黨人後蜀有侍中馮孚元和姓纂曰馮氏出
潁川者漢左將軍奉世之後出長樂者宜都侯參後出京
兆者燕王弘之後出弘農者弘孫西魏寧州刺史寧之後
出河間者唐監察御史師古之後虞部員外郎宿東陽人
文多不錄

荒

出姓苑

風

太皞伏羲氏之姓也三皇以來有天下者異德則異號異
號則異姓異號者如伏羲或曰庖羲神農或曰炎帝黃帝

或曰帝鴻異姓者如炎帝生于姜水黃帝生於姬水皆以爲姓詳此卽太皞東方之帝木生風故伏羲以風爲姓實象其德黃帝之相風后卽其裔也春秋有任宿須句顓臾四國在濟水上皆風姓司太皞之祀

風

一作風姓書曰人姓謹按此卽古文風字

○案字書韻書無風用二字豐

氏及通志氏族略俱以爲古文風字不知何据今依音附風氏後

豐

謹按春秋鄭穆公十一子子然及二子孔三族亡子羽不爲卿其存者唯罕駟豐

豐

出自姬姓周文王子酆侯之後以國爲氏春秋時赤狄潞氏之相曰酆舒

俸

案廣韻平聲一東無俸字此條原本次去聲三用雍氏後今依鄧氏原音讀若豐附入東韻

近世有此姓音平聲讀若豐

充

出自周官充人之後以官命氏戰國有充虞爲孟子弟子

洞仙傳有仙人充尙急就章有充申

案急就章充申屠顏師古注云充氏古

仙人充尙之後申屠則別爲一姓鄧氏及通志皆以充申連讀誤

漢百官表有左馮翊充

郎初平二年遷大司農

公

曹大宗姓源韻譜曰公正無私九命百里之號後爲氏焉

謹按灌嬰傳有楚將公杲則秦楚之際已有公氏

功

風俗通云晉大夫司功景子之後或去司單爲功氏

蒙

謹按魯頌曰奄有龜蒙遂荒大東則龜蒙魯封內之山以其在國之東故謂之東蒙孔子謂顓臾昔者先王以爲東蒙主是也秦將蒙驁及其子恬殺中庶子蒙嘉皆魯人之後又唐南詔蒙氏父子以名相屬如皮羅閣生閣羅鳳是也其後或入中國者遂爲安定人

紅

元和姓纂曰出自劉氏漢楚元王子紅侯富之後

鴻

謹按漢郊祀志曰黃帝相鬼與區號曰大鴻其卒而葬謂之鴻豕然則大鴻之後當爲鴻氏

叢

姓苑曰南陽叢鐸爲滁州刺史

翁

唐翁承贊字文饒乾寧中及進士第有詩一卷元和姓纂比部郎中翁義恪

後

出自董姓驪夷氏之後去夷爲驪氏春秋時鄭大夫驪蔑字然明六曰驪明爲子產叔向所知姓書未有原驪氏所

出惟元和姓纂微發其端今詳著之

蓬

段成式酉陽雜俎北海人蓬球舊姓書無此字今增入

古今姓氏書辨證卷一終

古今姓氏書辨證目錄卷二

上聲

一董

董孔

孔父

二腫

隴奉勇拱

三講

項

四紙

紙抵氏委蛾薦闖蓬寫觥

芊

是連 是婁 是賁 是人 是云 是奴 倚相

五音

視比 矢履壘 癸

水止 癸北

六止

市紀 祀似 姒已 史使 李理

始士 俟子 梓

市南 似先 史華 史晁 李蘭 土孫 土弱

土丐 土季 上貞 俟利 俟斤 俟亥 俟

畿 俟奴 子游 子有 子夏 子干 子羽

八語

圉呂汝處褚許巨矩所楚
舉莒敘莢咀

褚師巨母

九麋

羽禹字栩郇甫府武儼輔
柱詡豎庾主橘

羽弗字文甫爽武城武羅武都豎侯
主父

十姥

姥杜魯古伍五件虎琥鄔

楷

十四賄

隗

十五海

宰亥

宰氏

十六軫

軫菌閔

十七準

尹允

尹文尹公

十九隱

隱

二十阮

阮偃
阮寒
阮晚
阮圈
阮苑
阮宛

偃師
卷子

三十三旱

散罕

散宜
罕夷
罕升

二十四緩

緩晏
皖瑄
滿

二十五濟

反上

二十六產

簡

二十七銑

銑扁

二十八獮

衍展遣蹇單辯雋蜎免菟

鵠

輶遲

二十九篠

繳蓼

鳥洛

三十小

犀趙蟠

小王 擾龍 趙陽

三十一巧

佼綾鮑

鮑俎

三十二皓

皞浩抱老道稻棗玖考

昊英 浩生 浩羊 老陽 老萊 考城

三十三哥

我可娶左

可單 可頻 可達 可悉 左丘 左師 左史

左行 左公

可地延 可朱渾 可足渾

三十四果

瑣

火拔 火尋 頗超

三十五馬

馬堵 冷假 賈夏也

馬適 馬矢 馬服 馬師 者舌 野利 野詩

野頭 野辭 蚰蛭 賈孫 夏侯 夏父 夏

丁 夏陽 夏里 社南 社北

三十六養

養 蔣 鞅 疆 罔 放 馴

養田 爽鳩 長孫

三十七蕩

蕩 盪 莽 黨 蒯

廣武

三十八梗

丙 邴 景 省 杏

梗陽 邴意

三十九耿

耿幸

四十靜

頴領井省消

井强六斤

四十三等

鄒

四十四有

友柳鈕雀醜鼻白

有扈有巢有窮有男有鬲有偃右師

右宰右公右行右扈醜門白季受

酉壽西

四十五厚

厚後后邱斜苟

厚止牡止

四十七寢

沈暉

廩止

四十八感

禪譚
滿咎月

四十九敢

欖噉
啖

五十炎

冉染 貧奄

彡姐

五十三 蹀

減

五十四 檻

橄

五十五 范

范

范師

去聲

一送

貞弄棟痛仲

洞沐仲孫仲叔仲熊仲顏仲行

二宋

宋

統萬

三用

雍

雍門

四絳

絳

五賓

被智

義渠

六至

摯遂 祕 魄 利 冀 貳 懿 駟 季

自

利孫 利作 棄疾 季孫 季連 季瓜 季老

地連 地倫

自死獨膊

七志

寺異 忌

寺人 食其

八未

緯 魏 費 尉 眈

魏 强 費 連 費 聽

九御

御 慮 鑣 庶 茹 豫

御 龍 去 疾 去 斤 著 工

十遇

注 裕 諭 喻 俞 傳

注 吾 務 相 具 封 傳 餘

樹 洛 于

十一暮

慕募度路潞顧互胙

慕容慕輿路中路洛護諾素和素黎

布邾庫門庫汗庫狄庫成步叔

庫如干庫僂管步大汗步鹿孤步六根

步六孤

十二霽

蒂采惠桂吞炁快隸

第三第五細封契苾惠叔惠牆麗飛

十三祭

衛芮贅銳敝制厲世

十四泰

泰太藹柰大蹕貝沛會最

祓蔡賴

太叔太士太史太室太師太祝太陽

大陸大庭大心大狐大公大野大

夫大食大彭大賀大山大連大征

大師大拔會序會稽蔡仲

大莫干大利稽

十六怪

祭介玠蒯蕢

祭公

十七夬

快噲殮

十八隊

對

十九代

璽戴

二十一震

振信遴蘭晉釁印

慎潰

二十三問

問鄆覬訓

問弓問薪運奄運期

二十四炊

斬

二十五願

怨方萬曼婉憲

曼正

万紐于

二十六恩

頓論

困沒長

二十八翰

汗駢炭犴僕

幹猷

二十九換

貫灌冠爨段奐

冠軍
段干

三十諫

諫
晏

參龍

三十一問

蘭

三十二霰

倩殿練見嫵

縣潘

三十三線

鮮單遣援眷繚卞弁羨

鄣善羨門

三十五笑

召寮

召伯少正少師少叔少西少王少施

三十六效

豹淖

校師

三十七號

到受部操暴漕野悼

三十八箇

賀

賀蘭 賀若 賀遂 賀婁 賀敦 賀賴 賀魯

賀葛 賀兒

賀六渾

三十九過

播

破丑

破六汗 破多羅

四十禍

謝夜斥射華化

下門下陽

四十一漾

向暢匠尙償望相

匠僂匠麗尙方

四十二宕

浪盎甕伉亢阬曠

四十三映

敬慶孟柄

慶父慶忌孟獲

四十五勁

政正聖鄭性姓令舅盛

正令

四十六徑

寧

四十七證

乘

乘馬 乘止

四十八嶝

鄧

鄧林

四十九宥

右祐富俞廖秀就壽

宥連副呂富陵富呂廖叔

五十候

候茂鄧豆寶鬪勾漏

茂眷戊地豆盧寶公鬪比鬪強鬪文

鬪班鬪于

五十一幼

謬

五十三勘

贛婁

五十四闕

闕淡

五十九鑑

監

六十梵

況

入聲

一屋

屋穀谷禿賴角祿鹿衆鏃

鎬卜木沐福幅伏復服瀆

縮陸麴淑育祝叔菽畜鄩

竹竺郁肅宿玉璽睦繆穆

屋廬 屋南 屋引 獨孤 谷會 谷渾 谷那

斛律 斛穀 斛粟 斛斯 禿髮 祿里 鹿

勃 卜梁 木易 沐蘭 福子 伏侯 陸終

祝固 叔孫 叔仲 叔帶 叔達 叔先 叔敖

叔梁 叔夙 郁朱 目夷 牧師

獨孤渾 斛瑟羅 木骨間 伏侯龍 宿六斤

郁久閭 郁原甄

二沃

毒褥 褥 賊 鉉

僕固 僕蘭

三燭

辱綠遂足越續粟丁

燭盧

四覺

角催岳樂卓樸朴濁濯

樂利樂王

五質

邳帙一漆匹吉佚栗室畢

姑率密乙

悉羅悉雲漆雕栗陸室孫叱列叱利

叱干叱呂叱奴密貴密須密草密

茅乙旃乙干

一利啞 一斗眷 一舡婁 乙速孤

失利波羅

六術

述 橘 肱

黜弗 黜容 出連 出就

八物

弗 蔚 屈 弗

弗羽 弗忌 不蒙 不更 不第 屈侯 屈南

屈盧 屈同 屈門 屈引

九迄

暨 乞

古今如月書英記卷二
乞伏 乞連

乞利啞

十月

厥 闕 髮 謁

越質 越勒 越椒 越强 闕門

十一 沒

骨 悖 紇

沒藏 沒鹿 紇干 紇奚 紇骨 鶻奚

沒鹿真 骨咄祿 勃罕野 嗚石蘭 紇豆陵

紇突鄰

十二 曷

姐 遏 刺

鶻冠 達勃 渴候 葛伯

渴足渾

十三末

末 秣 括 斂

拔拔 拔略 拔也

拔則蘭

十四黠

滑 伏

滑伯

十五鎋

古今姓氏書辨正卷一
利利

利利邪伽

十六屑

頡齧

鐵弗 頡那

十七薛

薛泄洩 高裂竭 折舌 欒悅

說 砮

列禦 揭陽 折掘 折婁 悅方 別成

十八藥

藥略 砮都 搏

若敖 若羅 若干 矍相

藥羅葛 若口引

十九鐸

莫幕 鄭落 絡駱 雒錯 閣鄂

薄郝 索恪 蘄博 霍郭

鐸遏 莫侯 莫輿 莫盧 莫折 落姑 落下

駱雷 拓跋 拓王 索盧 薄奚 薄野

莫那盧

二十陌

貉白 帛伯 柏百 劇窄 竿筵

卻格 翟號

白公 白侯 白冥 白象 白威 伯宗 伯高

伯成 伯有 百里 卻州 赫連 號射

二十一麥

麥

麥正

二十二昔

掖易 液釋 鹵石 鉅席 夕藉

射

益壽 赤松 赤章 石作 石駘 石戶

籍正 辟閭

赤小豆

二十三錫

錫 酈 狄 休 壁 戚

析成

二十四職

敕 息 植 識 棘 弋 稷 囟

直 勒 勅 力 弋 門 卽 墨

二十五德

勒 特 墨 塞 北 國

黑 肱 黑 齒 墨 夷 墨 台 万 俟 北 宮 北 郭

北 殷 北 旄 北 鄉 北 正 北 附

二十六緝

古今如月書彙言卷二
一
立給戢

執失 邑裘 邑由 邑里

二十七合

合郤領俗

合博 沓盧

二十八盍

蓋屋垂

蓋樓

二十九葉

葉接涉 獵捷聶輒

接輿 涉其

三十怙

俠莢

莢成 牒云 趺跌

三十一洽

夾邲

三十二狎

甲

嘸噓 甲父

三十三業

業 鄴 脅

古今姓氏書辨證卷二

一東

下

東郭

出自姜姓齊公族大夫居東郭南郭北郭者皆以地爲氏
春秋時齊有東郭書又東郭賈字子方食邑大陸謂之大
陸子方

東里

莊子鄭之東里多才益七穆所居論語言東里子產是也
其支庶或以爲氏

東宮

元和姓纂曰東宮棄疾隱嵩山年三百歲謹按此必其先

出於列國世子居東宮而不得立者其後因以爲氏如大夫之氏於南宮北宮也姓纂又云齊大夫東宮得臣誤矣春秋時齊公子得臣爲世子不敢居上位常居東宮故傳稱衛莊姜曰東宮得臣之妹詩亦曰東宮之妹非得臣以東宮爲氏

東門

出自姬姓魯莊公之子遂爲卿居魯東門因氏焉謂之東門襄仲其子歸父以國討奔齊列子有東門吳漢孝武時善相馬者東門京鑄銅馬式獻之有詔立於魯班門外事具馬援傳又有瑯琊東門雲學嚴氏春秋官至荊州刺史東陵

風俗通秦東陵侯邵平之後又齊景公時有隱居東陵者
氏焉神仙傳有東陵聖母謹按漢地理志廣陵縣有東陵
亭卽盜跖死利於其上之地也博物志曰女子杜姜左道
通神縣以爲妖閉獄桎梏卒變形莫知所極以狀上因以
其處爲廟祠號曰東陵聖母然則聖母不氏於東陵特邵
氏齊人之說可據

東關

風俗通晉有東關嬖五漢有將軍北亭侯東關義謹按春
秋東關晉之門名其先晉守關大夫以地爲氏而義卽其
後特不可曰嬖五後也左傳曰外嬖梁五與東關嬖五晉
人謂之二五蓋晉獻公時有東關嬖人名五而失其姓應

劭以雙五爲名誤矣

東方

梁有宿豫士人東方光唐貞觀中定德州平原郡八姓其一東方氏也唐末有行營都統東方逵爲使相

東閭

姓苑云古賢者有東閭子謹按左氏傳東閭齊之門名所謂州綽門于東閭者當時大夫以所居爲氏

東鄉

世本曰宋大夫東鄉爲一

案通志氏族略廣韻東引爲下有人字

之後賈執

英賢傳曰漢并州護軍東鄉子琴高密人唐藝文志有東鄉助著周易物象釋疑

東陽

元和姓纂云祖氏家傳祖崇之娶東陽元旋女又宋員外

郎東陽無疑撰齊諧記七卷

案七原本作十据廣韻一東及唐藝文志改

謹按

春秋左氏傳魯齊晉皆有東陽魯之東陽在泰山南齊之東陽近萊晉之東陽在魏郡廣平以北今婺州屬縣亦有東陽必其先列國大夫有以邑爲氏者

東丹

五代時契丹阿保機長子突欲爲東丹王及德光立突欲奔唐唐明宗賜姓東丹名慕華後更姓名曰李贊華

東野

莊子有善御者東野稷一名畢事魯莊公謹按春秋左傳

東野魯地必稷之先爲氏宋有殿中丞東野春

東萊

謹按東萊後世以爲郡名必秦漢以來人以地爲氏

同蹄

本西羌人唐孝友傳永徽初有同官人同蹄智壽父爲族人所殺智壽與弟智爽候諸塗擊殺之今望出渤海

同官

元和姓纂曰出姓苑謹按同官縣名也必其先以邑爲氏

洞里

元和姓纂曰漢御史中謁者桐里斥生儒爲議郎謹按桐里二字相類而斥亦作桐里氏未知孰是也

桐門

桐門宋城北門也元和姓纂有此氏今著其說

銅鞮

謹按春秋晉羊舌赤食采銅鞮謂之銅鞮伯華及羊舌氏
亡以樂霄爲銅鞮大夫其地上黨銅鞮縣是也二人之後
必有爲氏者元和姓纂始收此氏今從之

中行

出自荀氏晉公族逝敖生荀林父晉文公作三行以禦狄
林父將中行謂之中行桓子以官爲氏桓子生庚及獻子
偃字伯游偃生穆子吳吳生文子寅其族有中行喜

中央

姓解曰中央氏古帝號其後以爲姓

中英

元和姓纂曰古帝少昊氏有六英之樂掌中英者以官爲氏

中梁

英賢傳曰古隱者中梁子之後謹按古字中

仲通用俱係去聲今與後中叔一條俱收入平聲非

仲通用俱係去聲今與後中叔一條俱收入平聲非必仲梁氏之後也

中叔

中叔圉之後晉有中叔無忌漢光武時御史中叔僚謹按古文

中與仲通用

中壘

元和姓纂曰風俗通劉向爲漢中壘校尉支孫以官爲氏終葵

春秋左傳魯定公四年成王封康叔於衛分以商民七族其一曰終葵氏

終古

元和姓纂風俗通桀內史終古後氏焉

戎子

元和姓纂曰戎子駒支之後爲氏謹按世無此氏而春秋時齊靈公之妾亦謂之戎子何獨駒支之後乃爲氏乎

弓里

後漢獨行傳建封二年騎都尉弓里戎將兵平定幽州謹

案弓里當爲戍之氏

宮孫

漢藝文志有宮孫子著書師古曰宮孫姓也不知名或云室孫氏室訛爲宮

熊相

春秋時楚大夫有熊相宜僚熊相謀賈執英賢傳有楚懷

王將軍熊相沂

案通志氏族略引作熊相祁

熊率

元和姓纂曰楚熊率且比後爲氏

空桐

案此下三條原本次公冉氏後今依廣韻次序修正

史記商本子姓其後分封以國爲姓故有空桐氏

空桑

英賢傳曰伊尹生于空桑後世氏焉

空相

晉惠帝時空相機殺南平將軍孟槐

公冶

出自姬姓季氏之族子曰季冶字公冶爲季氏屬大夫魯襄公二十九年自楚還季武子使公冶問公公賜之冕服子孫榮之以字爲氏故定哀間有公冶長字子長爲孔子弟子孔子以其子妻之卽其孫也原此氏所出者

○蔡原此氏上

疑當有姓書未有四字

今詳著之

公乘

漢陳餘娶趙苦陘富人公乘氏女又湖三老公乘與訟王
尊治京兆功效後漢更始有左輔都尉公乘翕新唐史公
乘億字壽山登咸通進士第魏博樂彥貞喜儒引在幕府
有詩賦二集

公孫

黃帝之後無人而春秋時國君之孫皆謂之公孫秦公孫
枝字子桑晉公孫杵臼孔子弟子公孫龍字子石皆以公
孫爲氏前漢紀平帝元始元年封周公後公孫相如爲褒
魯侯恩澤。案澤下當有侯字表曰節侯公子寬以周公後魯頃公
孫之立孫奉周祀爲褒魯侯二千戶元年六月丙午封十
一月侯相如嗣更姓公孫氏後更改爲姬氏然則後世公

子公孫之氏當以漢史爲正後漢玄菟太守公孫域擊破夫餘遼東兵馬公孫輔以身扞太守俱沒于陣南燕有侍中公孫五樓專總朝政兄冠軍將軍常山公歸叔父武衛將軍興樂公頽

公西

孔子弟子公西赤字子華公西輿如字子上公西蒧字子皙皆魯人邵氏姓解以赤與華爲二人誤甚矣

公叔

出自姬姓衛獻公少子發國人謂之公叔因以爲氏所謂公叔文子者也文子生公叔戌以罪奔魯亦作朱禮記又作叔木

案檀弓疏引世本衛獻公生成子當當生文子拔拔生朱爲公叔拔卽發也聲義相通鄧氏以發

爲獻公少子
未知何據

公子

元和姓纂曰春秋列國公子之後此知其說而未詳者今以漢史公子寬事爲正

公羊

齊公羊高子夏弟子作春秋傳又公羊賈始爲鑿巾以飯

。案賈原本作買
據禮雜記文改

公析

元和姓纂曰衛穆公生公析黑臀

。案臀當作背
鄧氏亦承其誤

其孫成

子朱鉏以王父字爲氏謹按春秋傳衛侯之弟黑臀字子叔別爲子叔氏其孫析成子亦不以公析爲氏未知林氏

何據也

公劉

姓苑曰后稷之祖有公劉氏誤矣古無此氏而公劉乃后稷之孫非其祖也此訛誤顯然者不可不正今駁去

公肩

孔子弟子公肩定字子中魯人

公牛

姓源韻譜曰其先齊公子牛之後淮南子有公牛哀病七日化爲虎

公師

出自姬姓後漢功臣表有公師壹劉聰有太中大夫公師

或

公旗

世本齊威王時有左執法公旗藩姓源韻譜曰齊悼公子
子旗之後

公右

姓苑曰高平人謹按春秋國君戎右謂之公右如魯顓孫
之類必有以世官爲氏者

公巫

魯大夫有公巫召伯仲其後以官爲氏

公仲

子華子曰程子聚徒著書門人之著書者曰公仲承最能

傳其道與留務滋同學務滋卽鬼谷子也

公禱

或作公禱漢藝文志有公禱生終始十四篇師古曰禱音疇其字從木傳黃帝終始之術

公族

東漢郭泰傳有公族進階其先出自晉公族大夫之後春秋時驪姬亂晉詛無畜羣公子自是晉無公族及成公自周歸晉始宦卿之適子以爲公族故趙盾請以括爲公族韓厥子無忌謂之公族穆子范鞅與欒盈爲公族大夫而不相能其後遂有以官爲氏者

公孟

出自姬姓衛襄公生公子縶字公孟以疾不得嗣其孫彊

以王父字爲氏

案杜預世族譜孟縶無子靈公以其子彊爲之後定十二年止義云縶字公孟故

卽以爲氏然隱八年正義引世本以公孟爲彊字與杜不合未知孰是鄧氏又以彊爲縶孫謂以王父字爲氏豈別有所據耶其宗人奔齊爲公孟綽

公他

世本曰有蒲邑大夫公他世卿其先以王父字爲氏

公玉

漢郊祀志濟南人公玉帶上皇帝時明堂圖師古曰呂氏

春秋齊有公玉丹

案史記孝武本紀索隱引風俗通作冉

此蓋其舊而說者

讀玉爲宿非也

公泥

姓解曰左傳季武子庶子公泥氏誤矣謹按左傳季公鉏一名公彌未嘗有公泥氏泥彌聲訛也今駁去

公綦

謹按後漢中平四年漁陽人張純殺護烏丸校尉公綦稠則公綦人氏也姓書未收今增入

公舌

姓解曰左傳晉大夫有公舌赤誤矣謹按古無公舌氏而晉大夫乃羊舌赤蓋羊公二字之誤今駁去

公帥

本公師氏避晉景帝諱改焉晉成都王帳下有公帥蕃

公甲

魯哀公二年大夫公甲叔子與析朱鉏戰吳人于夷吳人獲叔子邵氏姓解以公甲叔及公甲叔子爲二人誤矣今駁出公甲氏

公明

衛有公明賈爲公叔文子屬大夫孟子弟子有公明儀

考證

案檀弓疏公明儀乃子張弟子此云孟子未知何據

公明高

公歛

魯大夫公歛陽字處父爲孟氏宰能逐陽虎

公上

古有公上不害南齊有晉陵令公上延孫爲南沙人范脩化所殺

公山

左傳魯人公山不狃以費畔季氏而奔吳爲大夫不字

子洩

公罔

孔子弟子有公罔之裘襄相之射嘗使揚觶

公齊

元和姓纂孔子弟子有公齊定謹按家語史記無此人未

知何據

案公齊定疑卽公肩定之訛

公牽

姓解曰世本齊公子牽

案廣韻牽作成

之後有公牽氏

公仇

古今如日書卷之二
姓苑曰後漢零陵太守公仇稱出自晉穆侯太子仇之後
爲公仇氏

公幹

古今人表有公幹仕齊爲大夫後氏焉

公之

元和姓纂曰季悼子生思伯鞅鞅生懿伯拊爲公之氏

公勝

前漢藝文志技巧家有公勝子五篇

公城

南史王宏少嘗樗蒲于野舍及後當權有人就弘求縣此人嘗以樗蒲戲得罪弘詰之曰君得錢會戲何用祿爲答

曰不審公城子野何所在弘默然

公若

出自姬姓季武子之子公亥字公若其孫藐以王父字爲氏

公緒

後漢黨錮傳公緒恭爲八顧注公緒姓也

公儀

列子周宣王時有公儀伯以力聞諸侯其後有魯相公儀休又有公儀仲子舍其孫而立其子禮記檀弓注曰公儀蓋魯同姓

公皙

史記家語有孔子弟子公皙哀邵氏姓解以爲祈哀蓋祈析二字相近而林邵二家之說容有一誤今附見之

公輸

魯有公輸般爲工師孟子所謂公輸子之巧者其孫曰公輸若遂氏焉

公正

子思子有公正懿子衛人與子思論人主自臧則衆謀不進事

公思

魯季氏之族曰公思展後人以字爲氏

公襄

世本曰魯大夫公襄昭魯襄公太子子野之後

公戶

前漢儒林傳魯徐生善爲禮樂其弟子公戶

案廣韻引作扈今漢傳

正作

滿意爲禮官大夫

公慎

魯有公慎氏聞孔子爲政出其淫妻

公房

古今人表有公房皮出自芊姓楚公子房之後

公車

出自秦公子鍼字伯車後世別爲公車氏

公言

出姓苑未詳其所自

公金

世本秦公子金之後有公金氏

公獻

出姓苑未詳其所自

公息

呂氏春秋有鄭大夫公息忘

案今本呂氏春秋去九篇有公息忌與邾君論甲裳事

忌一作忘非鄭大夫廣顓鄭作邾與此亦異

公留

出姓苑未詳其所自

公朱

世本曰宋公子朱之後

公旅

出姓苑未詳其所自

公冉

魯叔仲氏家臣有公冉務人

工師

其先出自古官治水者以官爲氏漢有平悼侯工師喜子靖侯奴孫執

工婁

左氏傳遂國人四族其一曰工婁氏

紅陽

地里志紅陽漢南陽縣也酷吏尹賞傳曰永始元延間貴戚驕恣紅陽長仲兄弟交通輕俠藏匿亡命鄧展曰紅陽姓長仲字也師古曰姓紅陽而兄字長弟字仲今書長字或作張者後人所增爾一曰紅陽侯元王之子兄弟長少者誤矣謹按姓書漢紅陽侯劉富後爲紅氏周陽侯趙兼後爲周陽氏則紅陽氏之先亦侯家也今從鄧顏二注

驪夷

左傳驪叔安裔子董父能擾畜龍以事帝舜帝賜氏曰豢龍封諸驪川驪夷氏其後也杜預注曰驪水上夷皆董姓

二冬

冬

姓苑曰前燕慕容皝有左司馬冬壽晉史作佟壽未知孰是

佟

晉書音義徒冬反北燕錄有遼東佟萬以文章知名晉史燕慕容皝有司馬佟壽

儂

唐西南蠻居廣容之南邕桂之西天寶初黃氏居橙洞與常氏周氏儂氏相唇齒爲寇害據十餘州敬宗時黃氏儂氏據州十八經略使遣一人詣治所稍不得意輒侵掠諸州太和之後儂洞最強結南詔之助懿宗與南詔約和二洞數間敗之邕管節度使辛讜以美貨啖二洞首領太州

刺史黃伯蘊屯洞首領儂金勒等與之通歡負州又有首
領儂金澄儂仲武與金勒襲黃洞首領黃伯善伯善擊殺
金澄唯金勒遁免後欲舉兵報仇辛讜遣人持牛酒音樂
解和并遺其母衣服母賢者也謂其子曰節度使持物與
獠母非結好也以汝爲吾子前日兵敗不自悔復欲動衆
兵忿者必敗吾將爲官老婢矣金勒感悟罷兵裔孫儂智
高與弟智忠建忠自廣源州舉兵犯廣南破州郡仁宗遣
大將狄青破逐之

宗

後漢鄧禹以宗歆爲車騎將軍又涼州刺史宗漢得羌降
安夷縣長宗延爲羌所害又西河太守宗育徙居河東其

孫鳳閣侍郎檢校內史秦客中書令郢國公楚客司農卿
晉客楚客秦客與紀處訥朋姦世號宗紀元和姓纂以爲
周大夫宗伯之後以官命氏誤矣宗伯自爲複姓

彤魚

古今人表黃帝妃曰彤魚氏生夷鼓

宗伯

周官宗伯之後以官爲氏王莽以故漢少府宗伯鳳爲僕
射丞相王嘉言鳳經明行修又以爲太子少傅與馬宮袁
聖王嘉爲四師

宗正

南燕錄有宗正謙善卜

古今姓氏書辨證卷二終

古今姓氏書辨證卷三

三鍾

鍾

漢西曹掾鍾皓字季明生郡主簿廸廸生魏定陵侯繇字元常繇生侍中毓字稚叔二說皆有小誤

按上有脫文

謹按左

傳魯成公七年鄭人囚楚鄖公鍾儀獻于晉九年晉侯歸

鍾儀于楚後七年晉三卻始害伯宗子州犁奔楚爲太宰

蓋成公十五年也然則楚有鍾氏久矣昭王樂尹鍾建乃

儀之後而子期又建之孫皆非出自州犁州犁之後

○按原本

州犁二字不重今審文義補正

正合爲鍾離氏祖而昧子接雖爲鍾氏亦

不得爲鍾氏祖今宜曰鍾儀之先仕楚以所食邑爲氏則

古今事考卷三
一
姓系明矣南唐汀州刺史鍾全慕又禮部侍郎鍾謨曾稽
人壽春節度使鍾章合肥人生戶部尙書處謙

龍

漢藝文志有梁人龍德注雅琴龍氏九十九篇乃論治地
龍子之後

庸

出自商諸侯之國以國爲氏仕衛爲世族詩所謂彼孟庸
者也戰國有庸芮齊有庸職

雍

楊文公談苑音平聲

重

後漢耿弇傳有渠師重異注曰重姓也謹按少皞氏裔子重爲高辛氏讀平聲

從

七松反

元和姓纂曰東筦從氏漢有將軍從成公

蹤

今開封市人有此姓莫知所自出姓書未有今增入

樅

謹按前漢高祖紀高祖命樅公與周苛守滎陽師古曰樅千容反則樅人氏也地里志有樅陽必其先以地爲氏

恭

韻譜曰晉申生諡恭世子後人以諡爲氏宋政和中嘗詔

古今姓氏書辨正卷三
民姓犯翼祖廟諱者並改爲恭

翼

其先共氏避難加龍爲翼漢有翼遂姓書云晉大夫翼堅
後誤矣晉無翼堅漢渤海翼勝及翼舍避王莽亂不仕謂
之楚兩翼後蜀李壽以巴西翼壯謀殺李期而自立及僭
位以安車束帛聘壯爲太師壯固辭特聽縞巾素帶居師
友之位

共

謹按春秋時晉有共賜魯有共劉鄭有共仲皆爲大夫漢
初封義帝柱國共敖爲臨江王敖生尉

鍾離

出自子姓宋威公曾孫伯宗仕晉爲三卻所害其子州犁

奔楚食采以

○案以字疑
衍或當爲邑

於鍾離因以爲氏而世爲楚將

裔孫鍾離昧爲項羽將二子長曰發居九江仍故姓次曰
接徙長社爲鍾氏

鍾吾

出自春秋時子爵小國吳闔廬使執其亡公子燭庸鍾吾
子不可遂伐滅之以國爲氏漢尉氏令鍾吾蒼卽其後也

龍正

謹按王子年拾遺記窮桑氏之國有水屈曲亦如龍鳳之
狀有山盤紆亦如屈龍之勢故有龍山龜山鳳水之目亦
因以爲姓末代爲龍正氏出班固藝文志

封人

出自周官封人之後以世官爲氏一云古諸侯封人之後漢有司徒掾封人嬰元和姓纂曰古封畿之職爲氏左傳晉有蕭封人誤矣春秋時宋樂懼爲呂封人高哀爲蕭封人鄭仲足爲祭封人穎考叔爲穎谷封人如此非一又晉有蕭邑急就篇曰呂氏春秋韓封人子高

封父

出自夏諸侯封父之後其地汴州封丘縣有封父亭卽其所都周初國滅取其大弓繁弱以封伯禽於魯子孫遂以國爲氏謹按明堂位曰封父龜天子之器也蓋伯禽初封亦受此賜元和姓纂曰夏殷國名鄭有封父彌真爲大夫

雍人

元和姓纂曰周禮雍人以官爲氏魯有雍人高檀見左傳謹案魯有雍人高檀誤矣周官無雍人魯有雍人高檀則饗人之名非以雍人爲氏也春秋時諸侯掌膳羞之官或曰饗人所以有別於天子之內饗外饗而字皆從食如以雍人爲姓檀爲名則讀襄公二十八年傳雍人竊更之以驚亦可爲姓饗人而名竊乎今合駁正

雍止

晉郭默有將軍雍止洛蓋其先以所居爲氏謹案春秋雍止在宋鄭之間周封夏禹後於杞杞都雍止故後世謂雍止爲杞縣

逢公

出自夏商之世諸侯有逢伯及逢公者國于齊土因以國
爲氏古有善射逢蒙春秋齊有逢丑父楚有逢伯陳有逢
滑晉有逢大夫皆知名漢有逢萌前燕有逢羨萌字子康
北海都昌人所謂子康大賢所在人事如父者 北海逢
氏漢太尉信後趙秦州刺史碧唐中書舍人弘敏

逢孫

謹按秦穆公使大夫逢孫戍鄭逢孫密謀取鄭鄭覺而逐
之逢孫奔宋子孫以字爲氏

逢侯

史記世家楚懷王有裨將軍逢侯丑姪書舊無此氏今增

入

逢正

出姓苑

四江

江

太史公曰秦之先嬴姓其後分封以國爲氏故有江氏是也春秋時齊小白霸諸侯江人會于貫又會于陽穀楚人怒其親中國故滅江其子孫奔齊爲大夫齊悼公拘江說卽其人也裔孫德十世孫蕤晉譙郡太守亢父男生祚祚生統晉黃門侍郎生尙書僕射霏霏生斂斂生朱右僕射夷夷生朱吏部尙書湛

龐

出自高辛氏才子八人其一曰龐降子孫以字爲氏夏有賢臣龙圉卽其後也

邾

出姓苑廣韻曰後魏邾邾氏改爲河南邾氏誤矣邾邾乃邾邾也

龐

出自姬姓姓源譜曰襄陽安衆龐氏其家富盛好爲高屋鄉黨榮之號曰龐高屋襄陽記龐德公居峴山之南未嘗入城府夫妻相敬如賓子字山人

案原本脫山字據後漢書補

亦有

令名娶諸葛孔明妹爲魏黃門吏部郎生渙晉牂牁太守

又廣漢姜詩娶同郡龐盛女又益州刺史龐芝又中郎將龐浚援涼州後秦有大將軍左長史龐演魏尙書統

逢

出自夏商之世諸侯有逢伯及逢公者國於齊土因以國爲氏陳有逢滑晉有逢大夫皆知名前燕有逢羨萌字子康北海都昌人所謂子康大賢所在人事如父者 北海

逢氏漢太尉信後趙秦州刺史碧唐中書舍人弘敏

按此條

證已見二冬逢公條內冬韻之逢係本音江韻之逢音麗兩讀而辯證所引則一富必有誤○按此較逢公條少古
有下十七字宜移補於此所舉逢蒙等九人皆逢氏觀上云以國爲氏則必不入逢公條下且逢公與逢伯並舉若逢公爲姓則逢伯獨不可爲姓乎姓纂諸書無逢公一姓古今亦無姓逢公者疑鄧氏原書本無其姓編大典者因見文有逢公二字遂於逢氏外別出複姓兩存其說於每條之下耳

五支

支

其先月支胡人後爲氏石勒十八騎中有支屈六唐有感
化軍節度使支祥宋有蘇州吳縣人支詠

移

謹按後漢紀有南郡太守移良承宦官指停楊震棺露於
道側者風俗通曰齊公子雍食采於移其後氏焉

爲

世本晉始平人爲勉自稱將軍

嬌

出自虞舜生於瀉汭以水爲姓周武王時有虞遏父者爲

陶正能利器用王賴之以其先聖之後封其子滿爲陳侯
復賜姓媯以奉虞帝之祀是爲胡公胡公裔孫曰陳威公
鮑生太子免鮑弟曰厲公躍莊公林宣公杵臼杵臼生穆
公款款生共公朔朔生靈公平國平國生成公午午生哀
公弱及公子過公子招弱生悼太子偃師及公子留公子
勝偃師生惠公吳吳生懷公柳柳生閔公越又有五父佗
太子禦寇公子完公子黃皆見於春秋完奔齊爲工正食
采於田謂之陳恭仲其卜得繇辭曰有媯之後將育于姜
五世其昌並于正卿八世之後莫之與京果以媯姓奔齊
後爲田氏五世而陳無宇爲齊卿八世而陳常得齊政常
孫田和取齊而代之

隨

出自祁姓陶唐氏之後劉累孫杜伯事周宣王無罪見殺
子隰叔奔晉生士蔦蔦生會爲晉上卿食采於隨謂之隨
會子孫氏焉後漢蘇竟傳有偏將軍隨第姓纂曰周同姓
隨國爲氏誤矣隨乃漢東近楚之國終春秋世國存未嘗
爲氏

奇

謹按伯奇周大夫尹吉甫之子以孝聞然則奇氏蓋出自
尹氏也又有河南奇氏

岐

陳留風俗傳曰黃帝師岐伯之後唐段秀實與判官岐靈

岳謀殺朱泚迎乘輿不克被害 安化岐氏唐萬福府統

軍岐才慶州人

義

亦作儀

出自三皇太皞伏羲氏之後爲氏

案伏羲氏之後通志別爲戲氏魏志有戲志才

穎川人

宜

姓苑姓纂皆曰隋西南地有宜繒宜林

儀

出自衛大夫食邑於儀因氏焉一云周官司儀之後以世官爲氏春秋有陳大夫儀行父元和姓纂曰衛有儀封人誤矣封人非以儀爲氏

皮

後漢元初元年先零羌叛敗涼州刺史皮揚于狄道干姓
編曰望出下邳唐末有襄陽皮日休蘇州刺史生光業光
業生元帥府判官文璨文璨生子良仕

蕃

音皮。案此條原本次
危氏後今依音移附此

元和姓纂曰其先出自魯大夫食邑於蕃因以爲氏後漢
黨錮傳有蕃嚮謹按前漢睦孟魯國蕃人師古姓書云

姓書云三字疑衍師古
二字當在曰字之上

古今人表

按此下疑脫
司徒皮三字

曰詩所

謂蕃維司徒者今代詩本不從草亦不音皮未知孰是

按經

典釋文引白裘魯國記云陳子游爲魯相
蕃子也國人爲諱改曰皮也今附入支韻

兒

廣韻姓源韻譜皆曰出自吳郡有兒生而能語因以爲氏
音如之反 河南兒氏後魏官氏志代北賀兒氏改爲兒
氏赫連勃勃有鎮東將軍兒真之

離

出自古明目者離婁亦曰離朱黃帝時人風俗通曰漢有

中庶子離常

○按通志氏族略引有之字

後燕有離班

驪

驪出自姬姓之戎在驪山者因山以爲名國以爲氏

○案國上

疑脫因字晉驪戎之國是

訾

音茲

其先齊大夫食邑於紀之訾城北海都昌縣西訾城是也

後人因以爲氏晉趙簡子有家老訾祐又唐有曹州人訾亮與弟信爲中官楊復恭養子因冒其姓更名守亮守信舊姓書以訾音紫今兩存之唐呂元膺爲京兆尹擒賊訾嘉珍乃賊武元衡者朱滑州訾氏簡生行行生準準生湛字信道宣和三年進士又好水川之敗監渭州羊牧隆盛鹽酒稅內殿崇班訾贊死之詔贈成州團練使

卑

謹案後漢后妃傳熹平四年議郎卑整上言母以子貴之義風俗通曰卑氏鄭大夫卑湛之後

裨

左傳鄭大夫裨謏謀於野則獲謀於邑則否又裨竈能知

天道晉宣城內史桓彝有長史裨惠自此宣城郡有裨氏

諱○案廣韻平聲五支無諱字今依鄧氏仍次裨後

諶竈之氏亦通作諱

郛○案此條原本次蕃氏後依廣韻移正

謹按左傳趙盾殺公子樂于郛則郛晉地也必大夫食邑者爲氏

施

出自夏諸侯有施氏嘗以妹喜女桀者國亡以國爲氏周成王封伯禽於魯分以商民七族一曰施氏後世無聞唯魯國施氏出自姬姓惠公之子尾字施父生施伯伯孫頃叔生孝叔始以王父字爲氏孝叔孫之恆字子常○按史記作施

之常字子恆又施子世系不詳鄧云孝叔孫未知何據

爲孔子弟子裔孫漢博士雋

字長卿又有安州刺史炎太常博士敬本吳興後漢有施延吳大司馬施績梁施瑩入玉臺集

彌

三輔決錄云漢彌升新豐人以所居爲氏謹按春秋時瑕謂之彭封彌子必其氏也

池

風俗通曰氏於居

○按居原本作事据太平御覽三百六十二廣韻十虞十四清引風俗通改

者城郭園池是也

畦

雖音

按前漢符節令畦孟魯國蕃人師古曰息隨反今河朔尙

有此姓音字皆然而韋昭應劭並云音桂非也今有昞乃
音桂爾漢之決錄又不作睦寧可混揉將爲一族孟十一
世孫固固孫邁生易州刺史逸逸生後魏七兵尙書鎮鎮
曾孫燮生北齊國子祭酒仲讓仲讓生滑州別駕彥通又
魏志睦固字白兔殺楊醜以應袁紹曹公破之於射犬城
事出典論○按典論疑當作典略見魏志張楊傳注引燕慕容垂有中書令睦
遂義安後魏有睦邦馬邑有睦夸漢陽唐考功郎中希文

危

謹案危氏不著于隋唐之前唐末撫州南城人危全諷據
郡爲節度使其弟仔昌爲信州刺史仔昌失郡奔錢鏐鏐
惡其姓改曰元氏而全諷在撫州後與其壻鍾正時戰于

象牙潭正時執之而并有撫州其族在臨川有秘書郎傳
南城邵武有祕書丞序著作佐郎雍及危扶

支離

姓解曰莊子有支離疏誤矣謹按有

○案有上疑脫莊子二字

支離疏

支離叔支離益皆寓言謂人形之不全者未必人之姓名

蛇止

○案此條原本次彌牟氏後依廣韻移正

謹按春秋齊人滅遂遂國在濟北漢建爲蛇止縣屬太山
郡受封者因以爲氏後漢河南太守蛇止或生重濟北太
守女適羊續師古曰蛇音移

隨巢

漢藝文志有隨巢子六篇注云墨翟弟子謹按姓書未有

此氏而當時有胡非子隨巢子皆師墨氏則隨巢合爲人氏

奇斤

後魏官氏志代北有奇斤氏改爲奇氏

戲陽

○案此條原本次崎
正氏後依廣韻移正

出自衛太子蒯瞶之僕有戲陽速者其先以邑爲氏

崎正

出姓苑

訾嘏

○案此條原本次蛇
正氏後依廣韻移正

三皇時諸侯以國爲姓帝嚳妃訾嘏氏女是也元和姓纂
以爲訾氏祖誤矣訾嘏自爲複姓

施屠

前漢周勃擊燕得盧綰御史大夫施屠渾都師古曰姓施屠名渾都姓書未有此氏今增入

斯引

西秦錄有乞伏氏與斯引氏自漠北出陰山

彌且

且一作姐後秦有將軍彌且婆觸

○案原本脫觸字据晉載記補

彌且亭

立

彌牟

出自姬姓衛大夫公孫彌牟之孫或爲彌牟氏

六脂

京兆脂習字元叔與孔融善每戒融剛直太過必罹世患
及融死許下莫敢收者習往撫尸曰文舉舍我死吾何用
生爲曹公收習欲殺而赦之後至中大夫

夷

姓書云齊大夫夷仲年之後誤矣齊僖公之弟年字仲而
諡夷生公孫無知其後絕無以夷爲氏者謹按周虞人箴
曰在帝夷羿冒于原獸晉魏絳論有窮后羿及寒浞曰伯
明后寒棄之夷羿收之杜氏曰羿夷姓然則后羿姓夷自
虞夏間已有此姓孔子論逸民有夷逸孟子時有墨者夷
之皆當爲羿後也春秋時有夷國者楚滅之今爲亳州城

父縣此亦非夷姓所自出也今以虞箴左傳爲正

師

風俗通曰樂人瞽者之稱自晉師曠之後始以爲氏漢有東海師中作雅琴師氏八篇

資

謹案今蜀有資州卽古資中地

○按姓氏急就篇引風俗通云資氏黃帝之後食采

益州資中因以爲氏又見姓纂及廣韻此謹案上當有脫文

飢

春秋左傳曰成王封康叔于衛分以商民七族其一曰飢

氏

○案飢原本作饑誤說文飢饑也穀不孰爲饑廣韻飢

氏姓在六脂若入微之饑未嘗爲姓也史記殷本紀文王伐飢蓋卽耆國或以所封爲氏

茨

疾資切周時有茨茈晉人又東觀記曰茨充初舉孝廉之
京師同侶馬死舍車持馬相迎鄉里號曰一馬兩車茨子
河

尸

謹按左傳周有尸邑在鞏縣西南偃師城

○案此條當有脫文

耆

音祈

伊耆之後單爲耆氏

伊

後魏有代北人伊毅

弔

音釐

唐百濟大臣八姓其一曰刁氏

○按通志氏族略云蜀有刁達避難改焉廣韻刁作

刀刁作刁

追

左傳晉大夫追喜伐鄭之役以戈殺犬於門中以示閒暇
惟

吳氏干姓編曰後魏威帝后有惟氏謹案惟維二字皆吳
氏所增

遺

○案此條原本欠嫻氏後依廣韻移正

姓源韻譜曰魯費宰南遺後急就章有遺餘人

案急就章作遺失餘

此作人誤○按通志氏族略引謹按周禮地官有遺人掌與此同廣韻云急就章有遺餘

委積者鄭司農音棄遺之遺必其後以官爲氏

纍

風俗通曰嫫祖之後或爲纍氏謹案左傳晉七輿大夫有
纍虎

嫫

元和姓纂曰出自西陵氏女嫫祖爲黃帝妃後世以嫫爲
氏

夔

音葵

出自芊姓楚子熊摯有疾不可立以國授其弟別封爲夔
子其後不祀祝融與鬻熊魯僖公二十六年楚滅之子孫
以國爲氏石虎有太保夔安自天竺徙遼東立孫遼姚秦
司空騰仕後燕

騅

左傳晉七輿大夫有騅歟鄧大夫有騅甥

誰

謨按前漢丙吉傳皇曾孫賴吉得生吉謂守丞誰如皇孫不當在官使誰如遺書京兆尹遣與胡組同送京兆尹不受乃以歸史良娣之母孟康曰姓誰名如師古曰名誰如非姓誰也

夷陽

左傳晉厲公嬖臣夷陽五殺三卻傳曰五亦嬖於厲公則五姓夷陽明矣

夷門

姓纂曰史記處士侯嬴爲夷門抱關卒因氏焉夷門大梁門也

師宜

元和姓纂曰後漢有南陽人師宜官誤矣謹按晉史宜官姓師非以師宜爲氏其人乃書酒肆中爲字得錢輒滅去者

師延

古有師延作笙篴者世掌樂職因氏焉宋大夫有師延宜毗沙

百濟人姓

鴟夷

○案此條原本次葵
正氏後依廣韻改正

古今姓氏書辨正卷三
風俗通范蠡適齊爲鴟夷子後人以爲氏潛夫論曰鴟

通志氏族略引同今夷子出自子姓宋微子之後說苑曰

本潛夫論作鳩誤
鴟夷子皮齊人卽范蠡也

苾芑

姓苑曰晉有苾芑仲

祁夜

英賢傳云祁大夫後漢龍驤將軍祁夜豐

伊耆

亦作伊祁帝堯號也後因氏焉禮記明堂位注伊耆氏古
天子有天下之號也今姓有伊耆氏者魏孝文時魏懷州
民伊耆苟自稱堯後聚衆於重山作亂洛州刺史討滅之

伊力

南涼有前將軍伊力延侯勸禿髮檀坑內叛者王鍾等
五千餘人

葵止

春秋陳留外黃縣東有葵止大夫食其邑者氏焉英賢傳
古有葵止欣石季龍將有葵止直

古今姓氏書辨證卷三終

古今姓氏書辯證卷四

七之

台

音怡

出自墨台氏去墨爲台或云駘氏後改焉

時

齊大夫時子與孟子同時王嘗使留孟子魏鉅鹿時苗爲
令留犢於官

思

出姓苑

其

漢功臣表有陽阿齊侯其石

案漢書陽阿作陽河○案史記亦作河惟廣韻作阿與此

同以郎中騎從諸侯定楚侯五百戶生安國安國生午皆嗣侯午生共侯章更封埤山侯生仁有罪國除

元古其字

唐魏博大將元志紹攻德州又有元志求五代史有元元實

案元氏一作元廣韻無此字萬姓統譜歸入四支韻內今附入之韻

期

風俗通楚大夫居期思城因以爲氏謹案春秋楚期思公復遂之後有去思單爲期氏

旗

出自姜姓齊惠公孫竈字子雅生爨施字子旗後爲子旗氏亦或去子爲旗氏後漢有旗況

○按廣韻況作光

綦其音

元和姓纂曰河南有綦氏

案魏志綦連氏改爲綦氏

蘄

姓苑云蘄春侯

○案後漢郡國志江夏郡有蘄春侯國原本脫侯字今補

之後以國爲

氏其地今蘄州是也

詩

後漢馬援傳釐洽縣雒將女徵側嫁爲朱鳶人詩索妻諸
姓書以爲交趾人詩朱鳶誤矣

彤音而

出自宋大夫彤班之後宋武公伐長狄敗之以門賞彤班
謂之彤門子孫居焉漢功臣表有苳侯彤跖生昭昭子申

古今女上卷
二
尙景帝南宮公主皆嗣侯

嫫

音欺

見姓苑

姬

姬姓出自黃帝生於姬水以水爲姓黃帝生元囂囂生蟠極蟠極生高辛是爲帝囂囂妃姜嫫感巨人跡生子以爲不祥棄之隘巷牛羊避不踐之棄之山中山人養之棄之寒冰鳥覆翼之姜嫫怪之知其爲天子乃收養之名之曰棄堯知其賢才以爲大農命其官曰后稷姓之曰姬姬者姓也人本乎祖之義也黃帝爲姬姓棄復得之所謂本乎祖也棄爲后稷有功堯封之有釐裔孫公劉遷國於豳古

公亶父避狄又遷於岐下亶父生王季歷歷生文王昌又作邑于豐稱西伯其子發革商有天下是爲周武王自棄至武王十五世矣武王至赧王又三十有八王而秦滅姬氏降爲庶人或爲王氏漢武帝求周後得姬嘉封周子南君以奉文武之祀至晉劉琨嘗遣將軍姬澹帥衆十萬討石勒後周有柱國姬願隋有東宮幸臣姬威唐有水部郎中姬處遜居長安開元中避明皇帝嫌名改爲周氏謹案春秋武王克商成王定之大封同姓以爲諸侯凡五十三國而燕鄭又在其後故傳曰管蔡郕霍魯衛毛聃郛雍曹滕畢原酆郇文之昭也邲晉應韓武之穆也凡蔣邢茅胙祭周公之裔也又曰虞虢焦滑霍揚韓魏皆姬姓又曰泰

伯虞仲太王之昭也號仲號叔王季之穆也今取春秋三傳國語史記編次姬姓之人凡天子之國二諸侯之國三十一戎狄之國三其爵謚字名世系莫不備見讀之者如指諸掌具載春秋四譜及旁行圖云

箕

出自子姓商之季世封其父師爲畿內諸侯謂之箕子其地太原陽邑縣箕城是也武王克商釋箕子囚訪以洪範而別封於朝鮮後人以國爲氏春秋時晉大夫箕鄭箕遺漢西華令箕堪

釐

本僖氏漢時避諱改爲釐史記凡僖皆作釐是也後秦有

城門校尉釐豔

狸

元和姓纂曰八元季狸之後以王父字爲氏謹按狸氏之
先出於丹朱自爲狸姓不必八元之後

僖

出自姬姓曹僖公之孫負羈爲大夫以祖諡爲族氏又其
先黃帝之子得姓者十四人一曰僖後嗣至商周之際無
聞然亦姬姓後也姓苑以曹僖爲魯僖蓋字畫之誤

嬉

國語桀伐有施有施氏以妹喜女焉韋昭曰嬉姓或作喜
乃有施氏姓

熙

出自已姓高陽氏之後有修及熙帝譽使脩爲元寧熙佐
之後世皆以爲氏亦見英賢傳

治

元和姓纂曰出何氏纂文要音遲

蚩

音絺

元和姓纂曰蚩尤之後以國爲氏

慈

姓苑曰出自高陽氏才子八人天下謂之八元其一蒼舒

諡慈後世以爲氏急就章有慈仁佗

案王應麟急就章補注作慈仁化注曰顓

本作他李

謹按佛書云彌勒最初證得慈心三昧因號慈

氏異時祝事浮屠道者皆以慈爲姓如今之稱釋氏此乃異域之言當存而勿論然不著其說則恐○案原本恐奇者或引爲華人姓源故辨明之譌可今正好

茲

出自姬姓魯桓公孫曰公孫茲其孫母還以王父字爲氏

荏

姓解曰人姓也謹按漢地里志東郡有荏平縣王莽改曰

功崇應劭曰在荏山之平地又泰山郡有荏縣應劭曰荏

山在東北師古曰荏音仕疑切

○案此條原本次狸氏後考漢書地理志泰山郡荏

縣應劭音菑師古云又仕疑反東郡荏平縣師古音仕疑反依廣韻次序則音菑者當次狸下音仕疑反者當次茲下鄧氏於條末獨出師古音其意蓋主仕疑反故更茲氏條後

司馬

西京襍記曰司馬氏本周史佚後蓋史佚當出於重黎而
休父又出於史佚理宜然也春秋晉大夫司馬齊字女叔
謂之司馬叔侯叔侯生司馬叔游叔游裔孫司馬烏有功
于王室司馬彌牟爲鄆大夫至漢司馬遷自其父談世爲
太史公位次丞相蜀人司馬相如以文章顯魏大將軍司
馬宣王懿字仲達生文王師師生武王炎代魏命是爲晉
武帝事具太史公自序及東西晉史隋唐間舊定河內五
姓以司馬氏爲一門貞觀中定懷州河內七姓其一司馬
氏

司城

出自子姓宋武公名司空國人避諱改其官爲司城其公

族大夫樂喜字子罕生祈字子梁子梁生溷字子潞

○案當云

子梁生溷字子明子明生蒧字子潞此子潞上似脫七字

世爲司城以官氏

司空

帝王世紀曰禹爲堯司空子孫氏焉晉大夫有司空靖唐有司空圖司空曙圖字表聖以御史歸隱中條山時相盧攜寄詩曰姓氏司空貴官班御史崇

司寇

風俗通云蘇忿生爲周武王司寇支孫氏焉

司鴻

風俗通古有司鴻苟著書漢有諫大夫司鴻儀

期思

謹按漢地里志汝南郡期思縣故蔣國也春秋時地入於楚楚僭王號其縣尹皆稱公故大夫復遂食邑期思號期思公因以爲氏

綦連

北齊綦連猛傳曰其先姬氏因避亂居塞外祁連山以山爲姓祁音時蕃語訛故號綦連猶中國言天蓋天山也元和姓纂曰代北人號綦連部因以爲姓

釐子

世本曰出自釐子觀起之後楚大夫有釐子班

淄工

淄一作菑其先以所食邑爲氏英賢傳齊勇士菑正訃

茲母

元和姓纂曰漢御史茲母常出齊大夫茲母還後誤矣茲母還魯人也

八微

賁

音肥

又墳肥奔三音

○按肥字疑誤

沂相

英賢傳曰魯沂大夫爲相因氏焉漢侍御史沂相封

九魚

漁陽

燕大夫受封漁陽以地爲氏漢有少府漁陽鴻

十虞

厨人

元和姓纂曰周官厨人因官爲氏宋有厨人濮見釋例誤矣周官無厨人濮乃宋厨人名或厨邑之人名濮

邾婁

謹按春秋婁音閭

十一模

瓠音壺

莊子有瓠巴鼓瑟而游魚出聽

孤竹

元和姓纂曰遼西竹氏出自孤竹君本姜姓成湯封之遼西今支縣竹城是也裔孫伯夷叔齊辭國餓死首陽山子孫以國爲孤竹氏亦單稱竹氏謹按後漢書夜郎竹初有女子浣於遼水有三節大竹流入足間聞其中有號聲剖竹視之得一男兒歸而養之及長有才武自立爲夜郎侯以竹爲姓武帝元鼎六年南夷爲牂柯郡夜郎侯迎降天子賜其王印綬後遂殺之夷獠咸以竹王非血氣所生甚重之求爲立後牂柯太守吳霸以聞天子乃封其三子爲侯死配食其父今夜郎縣有竹王三郎神是也

徒人

元和姓纂曰左傳齊有徒人費國語有徒人回誤矣費等

皆徒人之以名見者古無徒人氏

徒何

後周柱國太尉李弼賜姓曰徒何氏

菟裘

史記秦嬴之後分封以國爲姓有菟裘氏春秋時菟裘爲

魯邑

菟賴

官氏志菟賴氏一曰菟賴氏後改爲河南就氏

十二齊

齊

晉有武邑侯齊炎八世孫抗字遐舉唐德宗宰相又瀛州

齊氏有玘生映亦相德宗唐宰相世系表全用其說止除
齊惡豹明見三人隋唐間有是光父者自稱齊姜姓後改
復舊爲齊氏事見孔至雜錄今詳三說皆誤謹按春秋姬
姓衛昭伯長子諡曰齊子蓋戴公申文公燬之兄也齊子
之孫惡始以祖諡爲齊氏惡孫豹爲衛司隸大夫以殺孟
縶罪爲衛所逐春秋書之曰盜裔孫明仕韓又仕東周以
姓見於戰國策則平恭侯受乃明之孫當齊惡得諡時姜
姓齊爲大國未有田和篡取之事豈得以國爲姓姓書自
應劭何承天以來相承一誤如齊晉秦楚不考其由皆謂
之氏於國者故姓纂唐表恥齊豹盜臣之名喜太公大賢
之後鑿空傳會皆以齊氏爲出姜姓而氏於國不曰出姬

姓而氏於諡後人因循訛謬遂失其本不可以不辯正昔
顏師古注睦孟傳曰近世私譜之文出於閭巷家自爲說
事非經典苟引先賢妄相假託無所取信善乎顏氏之知
言也

院

音堤

何氏纂文要曰古隄字

提

左傳趙宣子車右提彌明搏葵而殺之姓書未收今增入
奚

出自任姓夏車正奚仲之後以王父字爲氏孔子弟子奚

容蒧字子皙

案孔子弟子奚容子蒧字子皙一作子楷詳此則當爲奚容氏蒧誤作蒧

又成陽

定侯奚意生嗣侯信元康四年詔復其曾孫陽陵公乘通
河南奚氏達奚氏改焉

郛

音倪

出自曹姓邾武公封次子於郛是爲小邾其地東海郡郛
城是也春秋時小邾穆公之子甲仕宋又奔鄭始以國氏
謂之郛甲

兒

音倪

師古曰音五奚反後魏漢九真太守兒式

犀

○案此條原本次梯氏後依廣韻移正

出自戰國時魏將犀武之後元和姓纂曰秦有犀首邵氏
曰姓書元有此氏不敢削之皆誤矣謹按莊子音義曰犀

首魏官名若今虎牙將軍公孫衍嘗爲此官非以犀爲氏
今以犀武爲正

梯

晉書載記西秦建威將軍梯君破彭利和於澠川姓書未
收今增入

泥

世本宋大夫泥卑之後

○按泥卑通志氏族略引作卑泥

鮭音圭

元和姓纂曰中山鮭氏後漢有博士鮭陽鴻修孟氏易誤
矣謹按後漢儒林傳注曰姓鮭陽名鴻鮭音胡氏反其字
從角或從魚音胡佳反然則鮭無單姓者

汪音圭

南陽涑陽汪氏漢有大鴻臚氏汪丹字子玉作易論易家
宗之稱爲大儒

畦

晉書載記後燕慕容寶時魏伐并州寶引羣臣議於東宮
中書令畦邃請深溝高壘以困魏師音義戶圭反姓書未
收今增入

蜀音攜

梁四公子其一曰蜀闖

毒音攜

出姓解

聖

音攜

姓苑曰聖戶圭反

倭

音棲

見姓苑

案字典廣韻俱不載此字疑卽鄭氏之誤今附入齊韻

西周

元和姓纂曰周末分爲東西二周各以爲氏武公世

○案廣韻

作庶子稱爲西周氏

西郭

英賢傳云齊隱者居西郭氏焉漢有謁者僕射西郭嵩晉有祕書郎西郭陽何承天以爲中朝名士

西方

五代史定州蒲城人西方再遇爲州校生鄴後唐寧江軍

節度使

按五代西方再遇爲州軍校此作州校誤

西河

後漢馬援傳有西河子輿相馬法則子輿姓西河而姓書遺佚未收今增入

西乞

元和姓纂曰秦將軍百里術字西乞其孫以王父字爲氏

西陵

古侯國也黃帝娶西陵女爲妃號曰嫫祖元和姓纂曰世本春秋時有大夫西陵羔

西樓

出自姒姓夏後杞東樓公之子曰西樓公子孫以號爲氏
西門

唐末宦者西門重遂西門正範西門思恭皆爲樞密中尉
西宮

姓苑元和姓纂皆未詳謹按左傳鄭盜攻執政于西宮之
朝鄭人討西宮之難則西宮執政所居以別於太子之東
宮而後世氏焉

西王

新序子夏曰禹學於西王國

西鄉

風俗通曰宋大夫西鄉錯之後尸子有隱者西鄉曹

西都

出王符潛夫論

西閭

說苑有西閭過

西素

出傳餘顏復姓錄

奚計盧

河南官氏志奚計

○案今本官氏志計作斗盧氏改爲索盧氏

古今姓氏書辨證卷四終

古今姓氏書辨證卷五

十三佳

媯

音瓜

女媯之後

柴

出自姜姓齊卿高恭仲侯裔孫柴字子羔爲孔子弟子後
世以柴爲氏邢州龍岡柴氏有守禮者生榮其姊適周太
祖爲聖穆皇后太祖養榮爲子是爲周世宗皇帝生恭帝
宗訓紀王希謹世宗之弟貴虢州防禦使生肅閣門祇候
肅曾孫之子詠以比部員外郎封崇義公生右侍禁若訥
亦封崇義公晉州族人東頭供奉官延可生用政用政生

右侍禁元亨元亨生供備庫副使愈愈生南唐江州刺史
克宏晉州臨汾柴氏紹字嗣昌唐鎮軍大將軍譙襄公尙
高祖平陽公主夫妻佐義師有功生右屯衛將軍哲威衛
州刺史襄陽公令武

娃

出纂文要

鮭陽

後漢牟融代鮭陽鴻爲大司農鴻字孟宗注曰鮭陽姓也
十四皆

懷

左傳周成王以商民大姓封諸侯以懷姓九宗賜唐叔姓

書曰懷姓出古帝無懷氏之後謹案顧雍傳有尙書郎懷叙望出河南

淮

出姓苑

十五灰

惺

○案原本此條次雷氏後依廣韻移正

出姓苑

回

出自妘姓祝融孫吳回之後以王父字爲氏

槐

姓苑音懷出夏帝槐之後

○案原本作商帝槐之後据廣韻改正

枚

音梅

漢宏農都尉枚乘生臯王莽時有越雋太守枚根今望出淮陰

梅

汝南梅氏出自子姓梅伯爲紂所醢武王封伯立孫黃梅號曰忠侯以梅爲氏世居楚鄭間漢將軍梅銅六代孫喜始居汝南又南昌尉梅福字子真

雷

出自古諸侯方

○案原本方作萬蓋方万形近而譌依元和姓纂改

雷氏之後以國

爲氏後單姓雷黃帝柏雷公淮南王郎中雷被後漢南郡潺山蠻雷遷晉豫章人雷煥爲豐城令後徙馮翊南朝處

士雷次宗後燕陽翟公雷羣前秦將雷惡地姚秦將軍雷奇唐著作郎雷穎左庶不當咸

頽

出自左傳周大夫頽叔之後姓解曰史記有頽當誤矣頽當姓韓封弓高侯故韓王太子也

崔

出自姜姓齊丁公伋嫡子季子遜國叔乙食采於崔遂以爲氏濟南東朝陽縣西北崔氏城是也季子生穆伯穆伯生沃沃生野八世孫天生杼

○案高誘淮南子說林訓注云崔杼齊大夫崔野之子與

此爲齊正卿諡武子生三子子成子彊皆爲慶封所殺子明奔魯生良十五世孫意如爲秦大夫封東萊侯二子業

仲牟業字伯基漢東萊侯居清河東武城生太常信侯昱
昱生襄國太守穆侯紹紹生光祿勳嗣侯雅雅生揚州刺
史忠忠生散騎常侍泰泰字世榮始居歙縣二子恪景恪
丞相司直生郡功曹因七子雙邯寓金虎藩固雙爲東祖
邯爲西祖寓爲南祖亦號中祖唐人姓書曰漢司隸清河
崔忠有三子長曰泰子孫居歙縣爲西祖今烏水崔光其
後也次曰恪恪弟因因子雙居武城爲東祖今僕射休兄
弟及青州崔亮其後也季曰寓號中祖司徒浩武陵公寬
及許州崔暹其後也寓四世孫琳字德孺案唐世系表琳作林孺作儒
魏司空安陽孝侯曾孫悅前趙司徒右長史關內侯三子
渾潛湛湛生顗後魏平東府諮議參軍生蔚自朱奔後魏

爲郢州刺史居滎陽號鄭州崔氏生暹幼字季陽後魏

永昌郡守五子彥珍景茂彥章彥穆彥昇彥穆後周少司

徒東郡公四子君綽君肅君胄

案唐世系表胄作宙

君瞻君胄生千

里千里生元綜相唐武后蔚少子或幼弟也居鄆陵爲許

州鄆陵房或孫隋本州主簿子今生利州刺史樞樞生峽

州刺史義直義直生知悌知久知儉知讓知溫知遜知溫

相唐高宗生泰之諤之泰之初以職方郎中預平二張官

至左丞黃門侍郎工部尙書諤之以商州司馬預平韋后

位少府監趙國公南祖崔氏泰少子景字子成淮陽太守

生璉字子建

案唐世系表璉作璉此作璉當誤

璉生破虜將軍權權生諫

議大夫濟字元先亦稱南祖濟生湫字道初湫生安定侯

融字子長生中書令溫字道和溫生魏常山太守就字伯
元就生上谷太守公安公安生晉大司徒關內侯岳字元
嵩岳生後趙尙書右僕射牧字伯蘭牧生後趙征東大將
軍蔭字道崇蔭生聊城令怡字少業怡生宋樂陵太守曠
隨慕容德渡河居齊郡烏水號烏水房生清河太守某二
子靈延靈茂靈茂宋庫部郎中居全節生稚寶後魏祠部
郎中稚寶生達

案唐世系表達字景通北齊三公郎中
生司徒長史德仁德仁生君實此脫

司

徒長史德仁生許州治中君實君實生宜君丞縣解縣解

生融字文成清河郡公融生翹唐禮部尙書清河郡公翹

生渠州刺史異異生能字子才嶺南節度使清河郡公能

弟從字子父淮南節度使清河公

案唐世系表
從清河縣伯

生慎由字

欽止相宣宗慎由生煊字垂休相昭宗謂之崔四公慎由

弟安潛字進之太子太傅正孝公皆有傳伯基八世孫密

密二子霸炎霸曾孫遵後燕太常卿生撫宋汝南太守撫

玄孫文仲生譽相武后

案唐世系表文仲之兄文舉生譽相武后

炎字季主魏

尚書生諒字士文生遇遇生瑜瑜生逞字叔祖逞生禕禕

四世孫漑字

案唐世系表漑生義元此作字誤

義立唐御史大夫清止貞

公義立生神基相武后神慶司刑卿魏縣子神慶生琳太

子太保

○按唐世系表及崔義元傳並作太子少保

清河大房逞少子諱宋青

冀二州刺史生靈和朱員外散騎常侍生後魏贈清河太

守宗伯生休寅休號大房休字惠盛後魏殿中尚書文正

公

○按唐世系表及後魏書本傳俱作侯

五子稜仲文叔文子忠子表

案唐世系

表稜作懷叔文作叔仁子忠作子侃子表
仲文北齊光祿

大夫生隋內史舍人儵儵
案唐世系表儵作儵○案
汲古閣本新唐書正作儵生虔

虔生益字元友益生昕暉暉渭州刺史生誠誠孫龜從字

元吉
○案唐世系表及崔
元略傳俱作元告相宣宗清河小房寅字恭禮
案唐

世系表恭禮作敬禮○案宋人諱敬字
故全書每以義相近之字代後倣此後魏太子舍人樂

安郡守生長
案唐世系
表作長謙給事中青州刺史生子令公華子

令高唐令公華生復州刺史大質大質生立覽立弼立機

立泰立覽曾孫湛字湛然生虔朝虔大理司直朝字懿忠

鄭懷二州刺史孫羣字敦詩相憲宗立弼延州刺史生宏

默道默道郁道郁生醴泉令綜綜生太子中允
攷證原本
作大理主

簿案唐世系表估爲太子中
允證爲大理主簿今據改估估生醴陞陞御史中丞八

子邠字處仁太常卿諡文簡生吏部郎中璜豐司農卿生

吏部尙書權字汝器鄧字廣略浙西觀察使諡德生瑀瑤

瑾皆觀察使璆字致美

○案原本美作吳据世系表改

相黃巢郇大理卿

無子邠無官生瓚字錫勲鄆右金吾將軍生琢字子文瑄

字右玉琛字真器珮字聲諫琪字廷秀鄆相宣宗鄜字德

章青州房琯生欽欽生京京生瓊

案唐世系表京孫瓊

慕容垂車騎

屬生輯宋泰山太守徙居青州號青州房輯生修之修之

生宋尙書郎元孫元孫生亮後魏僕射侍中正烈公亮生

士泰征蠻別將樂陵文肅公生肇師北齊中書侍郎襄城

男肇師孫道淹生方騫萬年主簿臨洛子方騫生正固武

功主簿正固生景旌大理評事景旌生圓相肅宗 博陵

安平崔氏仲牟爲漢汝陽侯始居博陵安平生融融生石

石生廓字少通卽四皓夏黃公也

按新唐書宰相世系表漢汝陽侯崔仲牟生融

融生石石生廓不言廓卽夏黃公又考前漢書張良傳夏黃公在漢初年已八十餘此云仲牟曾孫時代不合恐悞

廓生寂寂生欽欽生朝漢侍御史生舒漢四郡太守二子

發篆篆郡文學王莽召不起生毅毅生駟字亭伯長岑長

三子盤瑗寔

攷證案長岑縣名崔駟爲長岑長乃縣令之職原本作生長岑長三子盤瑗寔是以長岑

爲駟子名而盤瑗寔又爲長之子其譌甚矣今據後漢書改○案三子盤瑗寔唐世系表作二子盤寔瑗字

子玉寔字子眞生皓曾孫洪盤生烈後漢太尉生鈞字州

平西河太守十世孫昂生仁師相唐太宗四子揣擢攜

案唐

世系表挹挹戶部尙書生湜字澄瀾相中宗年二十九爲

攜作攝中書令以罪誅兄液弟滌博陵大房駟少子寔字子眞後

漢尙書生皓皓生質質生贊贊生洪字良夫晉大司農生

廓廓生遄遄生懿字世茂五子連琨格邈殊五房又燕主

賜王氏生怡豹侶同爲一房因號六房崔氏連姓纂作遭字景

遇鉅鹿令號大房生郡功曹綽二子標鑒標字格祖案唐世系

表作洛祖行博陵太守生後魏嶺南長史廣字仲慶生元猷元

猷生當字文業後魏中書侍郎當生伯謙字士遜鴻臚卿

諡懿伯謙生淵字孝源青冀二州司馬生綜字君維長安

令綜生慎字行謹胡蘇令慎生立暉相中宗○案唐世系表作相武后

中宗考元暉以武后長安三年同鳳閣鸞臺平章事當從世系表五王中一人也立暉生

璆璆珪璆璆禮部侍郎襲博陵公生震渙渙門下侍郎生

縱御史大夫常山忠公縱生元方沔州刺史元方生碣字

東標綜少子祕書監行功

○案唐世系表行功乃鑒元孫之孫爲元暉從祖而文藝傳云

行功兄子元暉與表兩不相蒙此以行功爲綜少子與文藝傳合然傳云行功祖謙之仕北齊終鉅鹿太守行功由部郎歷蘭臺侍郎則生閔景昱晷晃暈晨晷曾孫損字官階世系俱各不同

至無相德宗鑒字神具後魏東徐州刺史安平康侯三子

舍秉德習秉德驃騎大將軍諡靖穆子忻君哲仲哲仲哲

後魏司徒行參軍安平縣男生長瑜仲炎長瑜子樞等九

人號崔氏九龍

○按唐世系表長瑜二子子博子信子博隋泗州長史生元平侍御史元平五子行

範行則行簡行功行真行簡刑部員外郎行功祕書監子信孫義起戶部侍郎與此異

仲炎生君昭

君昭生播播生元亮元亮生無縱無縱生望之釋之藏之

渾之渾之生璪

○案唐世系表作璪

尙書右丞璪生元略元受元式

元儒元略義成軍節度使生鉉字台碩相武宗宣宗鉉生

沆字內融相僖宗元受直史館高陵尉元式相宣宗生鎮

鉤鉅第二房琨字景龍饒陽令行本郡太守二子經鬱經

生辨字神通後魏武陽太守饒陽侯諡恭二子逸楷楷字

李則後魏殷州刺史後將軍生士元士謙士順士謙

誤作士
元今正
周江陵總管武康郡公生隋沂州刺史曠曠生隴

州刺史礪礪生駙馬都尉博陵縣男恭禮恭禮生去惑興

宗興宗饒州長史生臨渙丞雋雋生懿懿生同州刺史頌

[illegible]

律山南西道案原本作山南東道節度使唐世系表崔珙傳改燥刑部尙書

珙相武宗璵字朗士河中○案原本作河東據世系表崔珙傳改節度使璿

常州刺史士謙弟說後周大將軍安平壯公生宏度宏昇

宏峻峻隋趙王府長史生洛令儼儼生暄皓晔徐州司馬其孫儀甫嬰甫皓安平公生監察御史渾及太子賓客清河孝公沔字若冲沔生成甫祐甫字貽孫相德宗除清吏八百員人不以爲私者無子以廬江令嬰甫子植爲後植字公脩相穆宗嘗請以無逸爲元龜然爲相無狀鬱後魏濮陽太守生挺字雙根後魏司徒泰昌縣子挺生孝芬字恭梓太常卿泰昌縣公孝芬生猷字宣猷隋大將軍汲郡胡公猷生仲方字文齊

案唐世系表文齊作不齊信都

太守固安縣伯仲方生壽字大德鳳泉令

○按隋書崔仲方傳壽作民壽

鳳泉令作定陶令

石泉縣男壽

○案原本壽作壽据世系表

改生安上字敦禮

○按

唐書本傳作名敦禮字按上世系表與此同

相高宗二子修業守業修業太子

通事舍人守業刑部侍郎孝芬弟孝暉後魏趙郡太守諡

簡生昂字懷遠北齊祠部尙書昂曾孫紹睿武邑令生白

水尉項項生汾西令昇之昇之生造字元宰相德宗第三

房格二子蕃穎蕃生天護穎八世孫不疑左補闕天護生

穆纂融纂字叔則後魏冀州刺史生缺北齊散騎常侍缺

生誠及世立世立隋大理少卿安平男生祁陽令抗抗生

潛漪汲漪河間丞生日用相唐中睿元三宗

○按唐世系表作相睿宗

元宗考日用以睿宗景雲元年參知機務未嘗相中宗此云三宗誤汲長安丞生日知字子

俊潞州長史中山襄公日用生宗之右司郎中元和姓纂

清河東武城後有齊郡高密藍田三崔氏門戶魏大和中

定清河崔爲山東五姓甲門又大和姓族品滎陽四姓鄭

皇甫崔毛又魏舊定清河崔爲第一甲門釋曇剛類例曰
崔懷兄弟并青州崔肇次盧鄭之後崔陵及青州崔亮次
之崔隆宗爲後舊定博陵崔爲次甲門曇剛類例曰先崔
昂次崔季舒及齊州崔光李公恠類例則首崔楷後季舒
又舊甲乙門者崔楷長瑜爲先子樞季舒次之舊博陵崔
在乙門者曇剛以崔暹入第五件案件字疑門字之誤李公恠則首
崔敬寬次崔暹唐魏鄭公定天下諸州姓譜以崔張房何
傅靳爲貝州清河郡六姓又後燕上黨太守崔敦博陵人
有五子兄裔三子弟休二子各專一業時號五子爲五舍
并裔休等子爲崔氏十門仕宦北齊崔暹崔昂崔季舒並
爲高祖任使時謂三崔唐崔義立神基琳三世爲蒲州刺

史又神基神慶神福兄弟三人相繼爲三庶子神慶子珪

又爲之開元中崔琳與弟珪瑤三人同時列戟號三戟崔

家天后時有二崔融俱爲郎官故以文章目翹父

按崔融史稱其

爲文典麗故以文章目之翹融之子也而以門戶目其一人蓋時不能辯也

賜姓西魏後周賜汲郡公崔宣猷武城公崔士謙並姓字

文氏安平公崔詵亦然宣猷曾孫敦士謙孫確詵之孫河

並復本姓

裴

出自顓帝裔孫大業生女華女華生大費大費生皐陶皐

陶生伯益賜姓嬴氏生大廉大廉五世孫曰仲衍

案史記大業取

少典之子曰女華生大費是爲伯翳生大廉大廉之玄孫仲衍此以女華爲大業子而以大費伯益爲兩人俱悞又

左傳高陽氏有才子八人庭堅卽臯陶字也
則臯陶爲顓頊子此則爲大費子於傳無徵仲衍四世孫

曰軒軒生湑湑生飛廉飛廉生惡來惡來生女防女防生
旁皇旁臯生太几太几生大駱大駱生非子周孝王使養
馬汧渭之間以馬蕃息封之於秦爲附庸使續嬴氏號曰
秦嬴非子之支孫封邽鄉因以爲氏今聞喜邽城是也六
世孫陵當周僖王之世封爲解邑君乃去邑從衣爲裴裴
衣長貌一云晉平公封顓帝之孫鍼於周川之裴中號裴
君疑不可辨陵裔孫蓋漢水衡都尉侍中九世孫燉煌太
守遵自雲中從光武平隴蜀徙居河東安邑安順之際徙
聞喜曾孫煜并州刺史度遼將軍子茂字巨光靈帝時歷
郡守尙書率諸將討李傕有功封陽吉平侯三子潛徽輯

徽字文秀魏冀州刺史蘭陵武公以其子孫多仕西涼者

故號西眷裴四子黎康楷綽黎字伯宗一名演游擊將軍

祕書監二子粹苞粹晉武威太守二子詵暉詵太常卿避

地涼州及苻堅克河西復還解縣生劭劭生和鍾

案唐世系表劭

生和生鍾

鍾生景惠後魏別駕景惠生會他會生韜韜生後

周司木大夫融融生儀同大將軍孝瑜居蒲州桑泉生寂

字立真

案唐書本傳寂字立真

相唐高祖司空尙書左僕射寂生律

師駙馬都尉河東公律師生承先殿中監他字元化後魏

中軍將軍荊州刺史生讓之訥之謁之訥之字士言北齊

中書舍人始居聞喜生挾世矩通世矩字宏大相唐高祖

所謂其姦足以亾隋其智足以佐唐者生宣機奉高善昌

粹子嘔生瑾自河西歸桑梓居解縣洗馬川號洗馬裴仕
前秦爲大鴻臚二子天恩天壽天恩後魏武都太守生安
祖祖思祖愛安祖安邑令生思濟思濟生宗賢宗賢生措
案唐世系表措作錯措生同機機生談相唐中宗祖愛生鴻臚卿義

同義同生仁素仁素生大同大同生炎字子隆相中宗

案

唐本紀及宰相表炎以調露二年四月同中書門下三品以光宅元年被殺是炎之相凡歷高中武后三朝此云相中宗世系表云相中宗武后皆誤炎生懿彥先仙先黎第二子苞生三子

軫不彬軫生嗣西涼武都太守三子邕裔策邕渡江居襄

陽生順宗順宗三子叔寶叔業令寶叔業齊南兗州刺史

初歸北號南來吳裴事後魏蘭陵郡公謚忠武子禧之芬

之簡之英之藹之禧之字文聽北齊隋王左常侍生正

案唐

世系表簡之曾孫正生春此作蒨之生正與史互異

正生南鄭鄭令脊字歸厚脊生

同節守真九思守真字方中邠寧二州刺史生子餘耀卿

巨卿僑卿幼卿春卿昱子餘給事中諡孝耀卿字渙之相

唐明皇僑卿起居郎生尙舍直長汧汧孫戶部員外郎伯

言生邕管經略使行立令寶二子彥先彥遠彥遠生鑒鑒

生獻隋扶州刺史臨汾公二子義山羅義山生行本相武

后行本兄知節生倩倩生士淹禮部尙書絳郡公明皇狩

蜀時馬上與論宰相者生通字文元檢校禮部尙書羅隋

魏郡丞生公緯公繹公緯祠部郎中生瑾之倉部郎

中瑾之生淮

○案唐世系表公緯二子瑾之炎之餘與此同而淮傳云父炎之倉部郎中疑瑾之炎之

本一人而前後異名故此無炎之唐表誤列爲二耳

太子賓客正平懿公公繹邢州

長史生袁州長史無悔無悔八子韋

案唐世系表韋作卓

坦昌寬歆

恂晏京寬禮部尙書生諳字士明東都副留守京汝州別

駕生胄字遐叔檢校兵部尙書嗣中子裔晉太尉宋公版

諮議叅軍并州別駕號中眷裴三子萬虎雙虎三虎萬虎

生保歡保歡生良字元賓後魏太府卿良生隋太中大夫

子通子通兄弟八人皆爲名孝詔表門閭世謂義門裴氏

雙虎後魏河東太守生惠秀惠秀生梁兵部尙書嵩壽嵩

壽生後周光汾二州刺史琅琊公伯鳳伯鳳生定高德超

定高襲瑯琊郡公德超寧州刺史生思簡思諒思諒靈武

大總管河東郡公生行儉

案張說裴行儉神道碑行儉乃仁基子此作思諒誤張九齡裴

光庭碑亦祖仁基

唐襄武道大總管聞喜憲公其子光庭字連城

相明皇光庭生稹

案張九齡裴光庭碑稹作積

司勳員外郎正平縣子

稹生倩字容卿度支郎中正平節男倩生均字君齊左僕

射平章事均生鉷鳳翔府參軍三虎後魏義陽太守三子

文德嵩仁桃弓嵩仁曾孫耀之高陽太守生武陵令知道

知道生中書舍人義宏義宏生蜷

○按唐世系表作倦

字翁喜杭州

刺史河東縣男生遵裕遵業遵慶遵慶字少良相代宗生

會向向字儵仁吏部尚書生寅字子恭御史大夫寅生樞

字化聖相昭宗苞第三子丕丕孫涼州刺史定宗生後魏

冠軍將軍訛訛生太原太守遼遼生正平太守鄜隴西郡

公纂纂四子舒嗣秀詢舒後周車騎將軍元氏公生昂昂

生立運濮州刺史立運生季友司門郎中生武武曾孫訢

訢生總太常博士總會孫安期汾州司馬生後已循已修

已後已濟源令生郁邠邠郃循已右

○按唐世系表作左

衛大將

軍生郛

○按原本郛作郛据世系表改

郛郛郛修已左贊善大夫生郛郛

郛汾州別駕生福建觀察使父及虔州刺史稷父生坦字

知進相唐僖宗生大理丞儲

案唐世系表儲係稷子

儲生贊

○按裴坦傳云

從子贊贊乃儲子則儲非坦子明矣

字恭臣相昭宗東眷裴出自茂第三子

輯號東眷生頴司隸校尉頴生武字文應晉大將軍玄菟

太守永嘉末避地平州生開開字景舒仕慕容氏太常卿

祭酒三子原成範範字仁則河南太守四子韜冲湛綏冲

字泰寧後秦并州刺史夷陵子五子道子道護道大道會

道賜道子字復泰本州別駕從劉裕入關事魏南梁州刺

史義昌順伯三子德歡恩立輔立德歡一名度豫鄭廣坊

四州刺史諡康二子澄禮澄字靜慮後魏汾州刺史生景

漢尼尼字景尼後周御正大夫三子之隱師民之爽之爽

生希仁希淳

案唐世系表淳作惇

希莊希莊陳州刺史生抗抗生宣

宣生肅字中明浙東觀察使三子儔休休儔字次之江西

觀察使休字公美相宣宗休字冠儀諫議大夫生澈字深

源相僖宗道護二子次愛祖念祖念

○按次字疑衍念下疑脫祖字此承唐世

系表之誤

生宏陁後魏聞喜公生鴻琳易郡太守生客兒後魏

長平郡丞弟鴻智襄州刺史

○案唐世系表作長史

高邑縣侯生師

道師道生懷儉監察御史立孫昱高陵令生垧相憲宗獎

諫官使盡忠者師道之弟師武生懷感

案唐世系表懷感係師義子

澧

州刺史曾孫冕字章甫相代宗懷感五子其少子魯師生
知機知機二子鉉寘寘生有鄰濮陽令有鄰生淑按唐書
作淑
澠池丞淑生度字中立歷相唐憲穆敬文四宗位司空晉
國公用不用常爲天下重輕生謨諛調識誠讓諛識有
傳唐疏勒國王姓裴氏自號阿摩支

栢

師古曰栢音布回反姓栢名育姓書舊無此氏今增入○

漢書律歷志安陵栢育治終始蘇林曰栢音
布回反師古曰姓栢名育也此條首有脫文

古今姓氏書辨證卷五終

古今姓氏書辯證卷六

十六哈

哀

○案此條原本次敬氏後依廣韻移正

後漢更始傳王莽使國將哀章守洛陽注曰風俗通哀姓出自魯哀公之後因諡以爲姓又後漢有故掖庭人哀置嫁爲男子章初妻宋有哀道訓居南康贛縣

來

漢光祿大夫來漢從楊僕擊南越孫仲諫議大夫生中郎將歛字君叔世稱天下義士歛生褒褒生稜稜生執金吾歷字伯珍歷生中郎將定定孫司空豔字季德生敏字恭達蜀執愼將軍七世孫蔚始徙江都蔚生繪繪生護兒隋

左翊衛將軍榮國公二子恆濟皆相唐高宗世稱護兒作相是也恆生虞部郎中景業濟諫傳位武后事知名生潤州刺史恭業中書舍人慶遠後漢又有并州刺史來機唐又有酷吏來俊臣寶歷時來擇字無擇應賢良方正科著秣陵子集一卷

萊

○案此條原本次哀氏後依廣韻移正

出自古諸侯萊國之後爲氏左傳萊子國爲齊所滅因氏

焉誤矣

○案此條當有脫悞

邾

出自子姓諸侯所食之邑春秋時鄭之時邾是也

楷

姓苑云櫛音扶萊切

台

姓苑云望出武功

郤

扶風縣名出自姬姓后稷爲堯大司農以功封郤支孫氏焉

欽

出自高陽氏才子八愷一曰頽欽後以字爲氏

十七眞

眞

董賢使太醫令眞欽求傅氏罪而無所得又百濟國八姓

一曰真近世真氏望出上谷

甄

元和姓纂云虞帝陶甄河濱因以爲氏是也其曰或音堅則誤矣甄義生於陶甄而不音堅凌義生於凌人而不音去聲皆後世聲變故與義不協姓氏多如此類皆不足訝政和中御前放進士唱名有甄益者中書侍郎林攄遽呼爲堅攄言者効攄不學以伏獵侍郎比之遂罷攄政事斥散秩甄氏唐方技傳有甄權及其子立言案唐書甄權傳權弟立言此作卓行傳有甄濟及其子逢藝文志有甄鸞注算經

因

左傳遂人四族殺齊戍者一曰因氏

闔

春秋楚大夫闔與罷之後

新

○案此條原本次邪氏後依廣韻移正

元和姓纂曰出自荀氏新稚穆子之後別爲新氏

辛

周武王太史辛甲封於長子後有辛伯辛有皆爲大夫有二子適晉史有辛廖其後或爲董史至秦將軍辛騰家于中山苦陘曾孫蒲漢初以名家豪俠徙隴西狄道曾孫柔字長泛光祿大夫右扶風都尉馮翊太守四子臨眾武賢登翁武破羌將軍後漢有隴西郡從事辛郁又隋辛彥之爲禮部尙書文帝令與沈重論議重不能抗曰辛君所謂

金城湯池無可攻之勢又改姓者後周賜綏化公辛并姓
宇文宿國公辛威姓普屯隋初皆復舊賜姓者後周項廩
賜姓辛氏生偃武偃武生義同皆顯于唐爲天水辛氏

辰

後魏官氏志代北譬歷辰氏改爲辰氏

○按今官氏志無此文

望出

河南

仁

五代史甘川回鶻可汗姓仁有仁美及其弟狄銀又有仁
裕皆嘗朝貢

人

出姓苑

申

伯夷爲堯太嶽之官封其後於申楚文王滅申以爲縣其
後以國爲氏楚大夫申侯是也其族仕諸侯者齊有申蒯
又有申鮮虞生傅摯魯有申豐申繻申須申夜姑又申黨
字周爲孔子弟子漢有魯申培公武帝東帛加璧召爲博
士後周賜北海公申徽姓宇文隋初復舊孫寧仕唐燕黃
門侍郎申允尙書左丞申紹北燕有散騎常侍申秀

鄰

漢藝文志道家有老子鄰氏經傳四篇注曰老子姓李名
耳鄰氏傳其學姓書未收此氏今增入

鱗

出自子姓宋威公御寇之後以王父字爲氏春秋時鱣
爲宋司徒鱣朱爲少司寇

陳

元和姓纂曰出自媯姓虞帝之後夏禹封舜子商均於虞
城三十二世孫遏父爲周陶正武王妻以元女太姬封之
宛止爲陳侯以奉舜後是爲胡公滿九世孫厲公他生公
子完字敬仲奔齊爲工正以國爲氏五世孫陳桓子字無
宇孫成子陳常又以所食邑爲田氏今詳左傳魯莊公二
十二年陳人殺其太子御寇陳公子完奔齊其後有桓子
無宇生文子須無武子彊僖子乞乞子占書其諸孫曰成
子常及瓘字子玉逆字子行又陳莊陳豹禮記檀弓有常

孫莊子名伯陳子車子車之弟子亢陳乾昔及其子尊已
論語有陳子禽至太公和遂篡齊國爲田齊和孫稱王十
五世孫齊王建爲秦所滅三子昇威軫威稱王氏是爲北
海陳留諸王之祖軫楚相潁川侯因徙潁川復爲陳氏生
嬰秦東陽令史嬰生成安君餘餘生軌軌生審審生安安
生常常生願願生四子清察齊尙齊生源源三子寔

○案原本

寔作實依世系表改下同

崩遂

○案唐世系表作遂

寔字仲弓後漢太尉掾屬文

範先生六子紀夔洽湛休光諡字季方獻文先生生青州

刺史忠二子佐和佐二子準徽字道基晉太尉廣陵公生

伯珍建興中渡江居曲阿新豐湖生正二子赤松世達

○案

陳書本紀
正作達

世達長城令徙居長城下若里生丞相掾康康

生盱眙太守英英生尙書郎公弼公弼生步兵校尉鼎鼎
生散騎侍郎高高生懷安令詠詠生安成太守猛猛生太
常少卿巨道巨道生文讚三子談先霸先休先霸先陳武
帝也談先梁東宮直閣將軍義興昭烈公生曇蒨曇項曇

蒨陳世祖文皇帝生鄱陽王伯山字靖

○案唐世系表陳書本傳俱作靜

之新安王伯固字牢之廬陵王伯仁字壽之江夏王伯義

字堅之桂陽王伯謀字深之衡陽王伯信

○按伯信字孚之此疑轉寫脫

去

曇瑱陳高宗孝宣皇帝生後主叔寶隋涪陵太守叔英

字子烈遂寧郡守叔堅字子成上黨通守叔卿字子弼鴻

臚少卿叔明字子昭淮南王叔彪字子華唐宰相叔達字

子聰伯山生隋溫令君範淄州刺史君通唐虔州刺史君

賓循吏傳加意勞來以還流移者伯固生萬州刺史願伯
仁生隋資陽令蕃伯義生隋穀熟令元基文州刺史察忠
州刺史憲伯謀生隋番陽令豐伯信生梁州刺史法會後
主生隋昌陽令莊字承肅又有潁川陳忠生邕邕生夷行
字道周相唐文宗其弟元錫生夷實夷則夷實生翱夷則
孫喜陵州別駕生陵州刺史聞聞生仲寓及昌誨仲寓生
光彖昌誨生康又宣帝子叔明三孫繹侍御史宏邢州刺
史某晉陵郡司功參軍某生兼唐右補闕翰林學士三子
當監察御史萇大理評事月有得於陽成者

○案唐書陽城傳有陳萇

者候其得俸嘗往稱錢之美月有獲焉此月有得於陽城者即用傳中語但意未明了

京字慶復祕

書監有傳京以從子褒繼生灌封高安丞灌生伯宣伯黨

又唐明皇宰相希烈汙僞官被誅自有世系漢史曰丞相
曲逆侯陳平陽武戶牖人有兄伯後漢武陵太守陳奉金
城太守陳懿蜀人陳省應募擊羌封侯又武陵豐中蠻陳
從零陵蠻陳湯左傳有樂祁宰陳寅孟子弟子有陳代陳
臻改姓氏者劉聰之臣陳元達字長宏本姓高以生月妨
父改陳氏隋唐間有陳永貴本姓白改焉有孫令英西魏
賜許昌公陳忻姓尉遲隋初復之其曾孫義感仕唐唐
表陳氏有四誤左傳武王以元女太姬配胡公而封諸陳
是太姬爲胡公夫人今以太姬妻闕父而生胡公一誤也
陳他殺太子免蔡人殺他而立厲公躍今以厲公名他二
誤也史記曰陳嬰母謂嬰曰自我爲汝家婦未嘗聞見汝

先世之有貴者今曩得大名不祥不如有所屬事成猶得

封侯

○案原本脫成字依史記補

今表云嬰軫之子軫相楚封潁川侯

三誤也史記成安君陳餘與張耳皆自大梁起兵從劉項取天下嬰自東陽以兵屬項梁餘嬰二人同時餘居大梁嬰居東陽本非父子今表云嬰生餘四誤也姓氏之書不可誤誤則子孫失其祖而後世秉筆者無所據依今改正其甚者而附之以新望云

秦

秦氏出自姬姓周文公世子伯禽父受封爲魯侯裔孫以公族爲魯大夫者食邑於秦以邑爲氏春秋魯莊公三十一年書築臺于秦卽其地也莊公大夫曰秦子乾時之戰

代君任患而身止於齊其家遂昌阜於魯國昭公時有大
夫曰商曰遄又有董父者仕孟氏爲孟僖子車右以力聞
諸侯商孫西巴案說苑作秦巴西有仁心嘗放麋與其母孟孫召
爲太子傅而託國焉漢興高祖用婁敬策徙大姓實關中
秦氏始自魯徙居扶風茂陵西漢有龔與羣從同時爲二
千石者五人世號萬石秦氏龔孫彭字伯平爲後漢循吏
有傳自彭而下顯者代不乏人

蟻

唐咸通中有蟻固知音律

邠

元和姓纂曰周太王居邠支孫氏焉

真人

○案此條原本次因孫氏後依廣韻移正

唐日本傳建中元年使者真人興能獻方物真人蓋因官而氏者按日本有朝臣真人猶唐之尙書

因孫

○案此條原本次申屠氏後依廣韻移正

出姓苑

新垣

陳留風俗傳曰畢公封於新垣後以爲氏漢望氣者新垣平以詐誅魏將軍新垣衍畏魯連之說不敢帝秦又新垣

固請子順相魏

○案孔叢子執節篇有新垣固與子順論相魏事此句有脫誤

新孫

出姓苑

新和

出姓苑

辛廖

英賢傳晉大夫辛廖之後漢有河間相辛廖通

申公

春秋時楚僭王號其縣尹皆稱公鬬克字子儀謂之申公
子儀屈巫臣字子靈謂之申公巫臣其後或以申公爲氏
風俗通止言巫臣之後又曰漢太子傅申公誤矣巫臣盡
室奔晉申公止姓申氏

申叔

出自楚大夫食邑於申而字叔謂之申公叔侯因爲申叔

氏春秋時申叔時勸楚莊王復封陳其子申叔跪識巫臣竊妻以逃申叔豫以忠言曉遠子馮者皆賢人又有申叔展其族申叔儀仕吳

申鮮

元和姓纂曰左傳齊有申鮮虞漢有中謁者申鮮淠謹按鮮虞姓申齊莊公之難奔楚爲右尹此必淠之先因其祖名鮮虞而食邑於申合以爲申鮮氏姓纂蓋援古而未明也

申章

漢儒林傳有長沙王太傅申章昌字曼君楚人傳穀梁春秋徒衆尤盛

古今姓氏書辨正卷六
申屠

唐貞觀所定涼州西平郡六姓有申屠氏五代有申屠謬

十八諱

荀

出自姬姓春秋時晉大夫荀息裔孫驪嘉會皆爲卿大夫其族爲大別爲三族一曰晉公族逝敖生林父爲文公中行將謂之中行荀氏二曰林父之弟首食邑於知以所食邑氏謂之荀知氏三曰逝敖曾孫歡食邑於程謂之荀程氏漢宣帝名詢當時改荀爲孫以避上諱故劉向校荀卿書謂之孫卿子十一代孫遂居潁川復本姓遂生叔字季和有子儉緄靖熹注爽肅專時人謂之八龍爽生或字文

若自有傳

郇

郇侯之後以國爲姓後漢荀恁亦作郇唐元載未敗時有男子郇謨以麻總髮哭於市疏其罪惡今淮南有郇氏乃音環未知其所以

淳

姓苑曰吳人

倫

風俗通云黃帝時樂人伶倫氏之後或單爲倫氏唐有監察御史倫元慶京兆人密州多此姓

淳于

故州國一名淳于其地城陽淳于縣是也春秋時杞滅之
淳于公如曹子孫以國氏史記有二淳于髡其一齊之贅
婿在滑稽傳其一稱先生者在孟子傳○按孟子戰國策
史記諸書迷淳于
髡事大都在齊威宣二王及梁惠王時年代相去
不遠似卽一人鄧氏謂有二淳于髡未知何據唐貞觀
所定河內七姓一曰淳于至憲宗避御名改爲于氏宋閬
州南都淳于氏五代登州刺史晏生尙書郎希顏

十九臻

莘

武陽莘氏出自姒氏古有莘氏諸侯也女曰修己爲鮒妻
生禹其後國亡夏后封其少子於莘女爲周文王后謂之
太姒其後以國爲氏

藝

與莘同或作藝

詵

出姓苑

二十文

文

茂陵文固陽本琅琊人善馴野雉爲媒用以射雉又漢初
越雋太守文齊不附公孫述以郡歸漢封成義侯西京雜
記大姓文不識家富多書文長倩家一產二男以前生爲
長唐開元太學博士文元忠謹按春秋蔡大夫文錯越大
夫文種楚大夫文無畏字子舟皆屬文王後又衛將軍彌

牟謂之文氏之子亦文王後也今兩存之宋文氏其先避翼祖諱拆其字爲苟文二字此世俗之誤也廟諱於文從苟紀力反從支普木反今以苟爲苟且之苟又改支爲文訛益甚矣蓋國初儒者少而民未知學故近世避諱更姓者一切謬誤如石城殿氏出於縣令庸人所改尙無足怪至文氏乃巨勲元老之家未嘗自別其誤而處之不疑尤可惜也

雲

河南雲氏後魏官氏志悉雲氏牒雲氏並改爲雲氏舊唐史教坊副使雲朝霞善笛

姪

國語祝融之後陸終第四子求言爲妘姓封於鄆其後別封鄆路偃陽凡妘姓四國皆爲采衛春秋時鄆子之國亦妘姓

云

妘姓或去女爲云

邰

古子爵諸侯國春秋時國小而近楚楚若敖父子娶焉鬬伯比及令尹子文皆其出也後以國氏

員

音云世俗讀與韻同蓋訛也前涼錄員懷遠六代孫半干少從王義方學義方曰吾聞五百歲一賢者生子子宜當因

古今姓氏書辨異卷一
三
遂命曰半于其先隋末徙居臨汾

君

姓書曰君牙之後謹按君牙君陳皆不著姓而邵公亦曰君奭何獨於君牙之後爲氏

軍

謹按安帝時潁川人史玉殺人其母軍請代玉死事見應奉傳則漢有軍氏

芬

戰國策晉大夫有芬質

○按通志氏族略引風俗通作芬賢

紛

戰國策魏臣有紛彊則紛乃其氏而姓書未收今增入

聞人

元和姓纂云少正卯魯之聞人後以爲氏此說未可據謹按家語弟子質疑者有此言孔子因而數卯之罪則聞人之說破矣漢后蒼說禮號后氏曲臺禮授沛聞人通漢子方子方以太子舍人論石渠至中山都尉

軍車

元和姓纂曰代北複姓

古今姓氏書辨證卷六終

古今姓氏書辯證卷七

二十一欣

訢

出姓苑

勤

風俗通魯大夫有勤成唐有館陶尉勤曾

勤宿

後魏末有賊帥勤宿明達

二十二元

元

前漢郊祀志秦始皇時有燕人元尙能爲仙方 河南元

氏出自拓拔魏孝文太和二十年詔曰北人謂土爲拓后
爲拔魏之先出於黃帝以土德王故爲拓拔夫土者黃中
之色萬物之元也宜改姓元氏都洛陽十一世一十五帝
一百六十一年爲後周北齊所滅初什翼健七子一曰寔
君二曰翰三曰閼婆四曰壽鳩五曰紇根六曰力真七曰
窟咄道武皇帝窟咄子也

案魏本紀及唐世系表道武帝俱作寔君子此作窟咄子誤

生明皇帝嗣嗣生太武皇帝燾燾生景穆皇帝晃景穆諸
子濬新成子推天錫雲楨胡兒休八房子孫聞於唐濬文
成皇帝也文成諸子弘長樂二房子孫聞於唐弘獻文皇
帝也獻文諸子宏幹羽勰四房宏孝文皇帝也子七人恂
恪懷愉懌悅恪宣武皇帝也懷廣平文穆王生文懿王悌

悌生驃騎將軍侍中贊贊生後周韓國公謙謙生菩提菩

提生寶琳寶琳五世

案唐世系表五世孫應作六世方合世系

孫文贊皆襲爵

而什翼健第六子力真力真二子意烈意勁意勁彭城公

五世孫敷州刺史楨生巖成巖字君山隋平昌公生琳弘

弘隋北平太守生義端唐魏州刺史義端生延壽延福延

景延景岐州參軍生南頓丞悱悱生比部郎中寬寬生穆

宗宰相稹字微之以詩名天下謂之元才子稹生道護

永州元氏結字次山水部員外郎老於文學居永州祁陽

縣自名其溪曰浯溪山曰崑山臺曰唐臺字皆從吾吾者

我也作大唐中興頌磨崖刻石焉至今溪上居民釣魚鬻

碑者數十室皆其遠孫桑梓猶在 宋朝杭州錢塘元氏

出自五代信州刺史侯昌撫州節度使危全諷之弟也與楊渥戰敗失郡奔吳越錢武穆王惡其姓改曰元氏

原

○案此條原本次袁氏後依廣韻移正

春秋時鄭有原繁陳之原氏所謂南方之原者後世望出魯郡者孔子弟子原亢字籍出南郡者趙廣漢傳有潁川大姓原褚宗族恣橫後漢漢中守鄭勤門下吏原展以身扞勤爲羌所殺

袁

出自媯姓陳胡公滿生申公犀侯犀侯生靖庚庚生季子惛惛生仲牛甫甫生聖伯順生伯他父他父生戴伯戴伯生鄭叔鄭叔生鄭仲金父金父生莊伯莊伯生諸字伯爰

孫濤塗從齊桓公盟會賜邑陽夏以王父字爲爰氏爰轅
一也濤塗字仲諡宣謂之轅宣仲生選選子聲子突突生
惠子雅雅生頗爲司徒奔鄭秦末裔孫告避難居於河洛
之間少子政以袁爲氏九世孫袁生立孫幹封貴鄉侯復
居東郡陽夏八世孫良二子昌璋昌成武令生漢司徒安
字邵公三子賞京敞京蜀郡太守二子彭湯湯字仲河太
尉安國康侯三子成逢隗成左中郎生紹紹中子熙其後
居樂陵東光熙裔孫令喜同州治中生異弘異度異式異
弘唐瀘州參軍生恕已相唐中宗恕已生淮陽太守建康
建康生給事中高嘗封駁盧杞復官制書知名璋生漢司
徒滂字光熙滂生煥字曜卿魏御史大夫四子罕

案唐世
系表罕

作侃遇與準字孝尼晉給事中生冲字景玄光祿卿生耽字

彥通歷陽太守耽生質字道和東陽太守二子湛豹豹字

士蔚丹陽尹二子洵淑宋吳郡太守諡曰正二子顗顗顗

字國章宋永州都督二子戢昂昂字千里梁司空穆正公

三子君正欽泌君正字世忠吳郡太守生憲顗顗後周驃

騎大將軍顗生子溫字君恪隋左衛大將軍溫生士政南

州刺史士政生當陽令倫倫生石州司馬知玄知玄生成

寧令煜煜生慈字德深相唐憲宗五子垌

○案唐世系表作垌

寔均

都郊欽泌二房世系具唐表 河東袁氏本出陳郡智宏

相唐高宗其孫幹御史中丞元和姓纂曰望出陳郡陽夏

者自後漢魏晉至梁陳正傳二十八人三公令僕二十七

人望出汝南者安後出彭城者生後出京兆及華陰者皆
煥後出襄陽者術後謹按左傳宣仲之後陳大夫有袁僑
及袁克

爰

漢爰盎後有爰猛者其大父爲廣川王中尉諫王發冢爲
盜後漢爰曾字子路起兵廬城頭時號城頭子路後趙有
鄆人爰赤眉妻李子揚以女與共爲妖亂唐有郛國公爰
子幹

垣

謹按後漢公孫述傳南陽人宗成起兵爲其將垣副所殺
注風俗通曰垣秦邑也因以爲姓是也晉宋而下垣猶屬

略陽郡南史垣護之略陽垣道人是也始皇將垣薊之後
晉有弘農太守垣延襲破劉聰軍宋臨淮太守益陽壯侯
垣護之字彥宗其弟積射將軍詢之護之子襲祖淮陽太
守詢之子崇祖字敬遠齊○案齊上疑脫南字五兵尚書驍騎將軍
驍騎將軍六字今刪乃榮祖之從弟也

輶

漢功臣表有輶買陳大夫

案陳大夫有輶諸生壽塗自陳胡公七代孫其後去車爲袁此

脫又輶
或作輶

輶

或作輶漢樓船將軍輶終古斬狗北將軍封語見侯

案漢書作

蒯兒師古曰輶音袁人姓也

樊

出自姬姓謹按周成王分魯公伯禽以商民七族一曰樊氏

言

仲尼弟子言偃字子游吳人莊子有言成子游偃生三思

女嫁子張之子申祥

案孟子作申詳

原伯

○案此與下原仲條原本次軒正氏後依廣韻移正

英賢傳曰左傳周原伯綏之後氏焉晉孝公時有大夫原伯蓋謹按春秋原伯貫在綏之前百年雖曰貫之後爲氏可也綏卽虐其與臣使曹逃者

原仲

元和姓纂曰陳大夫原仲後楚大夫有原仲蔑

軒轅

黃帝之後以號爲姓唐韓愈集道士軒轅彌明作石鼎聯句詩一坐敬服宋光州固始令軒轅節

軒止

出自芊姓楚文王子食采軒止因以爲氏漢梁相軒止豹二十三魂

渾

出自姬姓周宣王母弟鄭桓公友友孫穆公之子偃字子游其孫爲游氏游氏之孫罕子寬又別爲渾氏河南渾氏出自匈奴渾邪王隨拓拔氏徙河南因以爲氏隋唐間

以氏爲部而屬回鶻在九姓諸部中族帳最南貞觀時薛延陀滅大俟利發渾汪舉部內向以其地爲臯蘭都督府其酋阿貪支者名潭隋王鈐衛大將軍生回貴唐豹韜衛大將軍靈止縣伯生元慶元慶生大德太壽太僕丞生釋之字釋之左武衛大將軍寧朔郡王生瑊相德宗位太師爲建中功臣自瑊以上世襲臯蘭都督謹按近世讀史者皆以瑊姓音混然未有明據也

昆

出自己姓昆吾之後單姓昆

溫

謹按春秋周武王克商蘇忿生以溫爲司寇其裔孫蘇子

叛王卽狄遂失國及晉文公納襄王王賜之溫晉大夫狐

溱陽處父卻至皆食其地陽卻無後惟狐氏子孫因以爲

姓狐本姬姓其先出自虞叔所謂公族者也漢有裨順侯

溫疥生仁仁子何

○案原本何作和依世系表改

始居太原祁縣何六代

孫序字次房後漢護羌校尉二子壽益壽鄒平侯相益字

伯起兖州刺史生恕恕生

○案唐世系表作孫

恢魏揚州刺史生濟

南太守恭恭二子羨懔懔晉河東太守生嶠字太真江州

刺史始安忠武公人謂之玉鏡臺羨犀照江而死者嶠兄

六人並知名時號溫氏六龍從子楷隨桓謐奔後魏立

○案

唐世系表作兄孫馮翊太守奇曾孫裕太中大夫生隋泗州司馬

君攸君攸生大雅彥博彥將大雅字彥弘唐禮部尙書黎

孝公生工部侍郎無隱坊州刺史釋胤彥博字大臨相太宗尙書右僕射虞恭公生太子舍人振延州刺史駙馬都尉挺彥將字大有中書侍郎清源恭公生瓚瑜瑾璩釋胤孫景倩南鄭令生太常丞輔國輔國生邈造遜造字簡輿河陽節度使禮部尙書祁縣子生璋京兆尹檢校吏部尙書振曾孫曦太僕卿及其子祕書監西華皆駙馬都尉裔孫庭筠本名岐字飛卿工辭章與李商隱齊名號溫李時宰斥其擾場屋不得第子憲光啟中及第爲山南從事李巨川嘗表雪庭筠曰蛾眉先妬明妃爲去國之人猿臂自傷李廣乃不侯之將人至今傳之庭筠弟廷皓拒龐勛不爲草表被害贈兵部郎中唐武德中溫彥博兄弟相代爲

中書侍郎時稱溫家二彥唐史曰初顏氏溫氏在隋最盛
思魯與大雅俱事東宮愍楚彥博同直內省游秦大有典
校祕閣顏以學業優溫以職位顯於唐初大雅遷黃門彥
博在中書皆爲侍郎對筦華近高祖嘗從容謂曰我起晉
陽爲卿一門耳河南溫氏後魏官氏志代北溫

○案今本官氏

志溫作盟益氏改焉

案後魏溫益氏及溫狐氏俱改爲溫氏

門

唐京兆尹呂元膺擒山棚賊門察

案門氏王應麟謂出自周禮公卿之子入王端

門之左教以六藝謂之門子其後氏焉莊子有門無鬼又魏書官氏志庫門氏叱門氏吐門氏後俱改爲門氏

孫

出自姬姓衛康叔八世孫武公和生公子惠孫惠孫生耳

爲衛上卿食采於戚生武仲乙以王父字爲氏乙生昭子
炎炎生莊子紇紇生宣子鮪鮪生桓子良夫良夫生文子
林父林父生蒯襄子嘉嘉字伯國世居汲郡漢武帝時會
稽人孫辛爲朱崖太守後漢建武中郎將孫永擊蠻又有
隴西太守孫純孫羌晉有孫登又出自媯姓齊田完字敬
仲四世孫無宇二子常書書字子占齊大夫伐莒有功景
公賜姓孫氏食采於樂安生憑字起宗齊卿憑生武字長
卿以田鮑四族謀作亂奔吳爲將軍三子馳明敵明食采
於富春自是世爲富春人明生顓顓生勝字國輔秦將勝
生蓋字光明○案唐世系表明作道漢中守生知字萬方封武信君
知生念字湛然二子豐益益字元器生卿字伯高漢侍郎

生憑字景純車騎將軍二子屈詢詢字會宗

案唐世系表會宗作會定

○案汲古閣本新唐書作會宗

安定太守二子鸞騏鸞生爰居爰生福

爲太原太守遇赤眉之難遂居太原太原之族有嵐州刺

史昉生存進安定太守詢次子騏字士龍安邑令二子通

質通子孫世居清河

案唐世系表通子孫世居清河後魏有清河太守靈懷此清河下脫後魏

有清河

太守靈懷武德中子孫因避亂徙汝州郟城靈懷

曾孫茂道初名處約字歷道相唐高宗五子佺侑俊倣仝

安邑令騏少子質字子遠後漢天水太守徙居青州生厚

字重殷大將軍掾生瑤字良玉中郎將生邃字伯淵清河

太守生儵字士彥洛陽令生國字明元尙書郎生軌字立

志漢陽太守二子鍾旃鍾吳先主權之祖也旃字子之大

原太守二子炎厯炎字叔然魏祕書監生稜字仲觚太官

令生道恭字雅遜晉長秋卿二子顗芳顗字士若芳中書

令子烈避趙王倫之難徙居昌黎生岳前燕侍中子孫稱

昌黎孫氏厯幽州刺史右將軍生旂字伯旗平南將軍坐

與孫秀合謀夷三族顗避地河朔居武邑遂生輝後趙射

聲校尉生緯幽州都督生周後燕高陽王文學生恭仁北

燕司隸功曹二子苑尉尉字伯華後魏祕書棗疆戴男二

子伯禮方嗣伯禮○案原本脫此伯禮二字据唐世系表補巴州刺史龔棗疆

戴男三子元琬孝敏廣烈元琬北齊王文宣皇帝相國騎

曹生北齊治中大將軍司馬靈暉生萬安萬壽萬安隋徐

葵堯三州刺史四世孫迪樂陵王簿孝敏隋晉陽令生壽

張丞仲相

○案唐世系表作將

仲相生韓王典籤希莊希莊生宋州

司馬嘉之嘉之生逖唐刑部侍郎左庶子文公逖生華州

刺史宿宿生公器豈府經略兼御史中丞六子華清正簡

範聚晏華清太原尉正河中少尹簡東都留守太子太保

逖三弟邁羽林兵曹參軍遘亳州刺史造詹事司直邁四

子公彥睦州刺史客卿盱眙令公輔陸渾丞起白馬令起

三子非熊黃梅尉景商官天平軍節度使檢校禮部尚書

諡康清太原少尹景商九子備字禮用直文館藍田尉儲

字文府京兆尹樂安侯伋興元少尹儉字德府昭義判官

偓字龍光相昭宗伉春秋博士偁字文節集賢院學士司

勲郎中方嗣後魏建威將軍生仲瑜隋吏部侍郎二子恭

文石邑令孝哲曾稽令孝哲五世孫諫唐右武衛兵曹參
軍又前漢夏侯嬰傳曰初嬰爲滕令奉車故號勝公及曾
孫頗尙主隨外家姓號孫公主故滕公子孫更爲孫氏今
詳此卽漢公主母氏姓孫而夏侯氏有冒姓孫氏者又唐
宰相表云孫氏一出楚蚡冒生王子爲章字無鈞生爲叔
伯呂臣孫爲賈伯羸生爲艾獵卽令尹孫叔敖亦爲孫氏
誤矣謹按爲敖字孫叔一名艾獵古人先字後名故謂之
孫叔敖傳曰爲敖爲宰擇楚國之令典是稱其姓名伍參
曰若事之集孫叔爲無謀矣是稱其字也今駁正之明其
未嘗爲孫氏

敦

晉張方有將敦偉夜擊破劉沈軍

俚

纂文要曰音盆

○案廣韻俚字戶昆牛昆二切此音盆與標題不合恐有脫誤

盆

風俗通曰盆成括仕齊見殺其子逃難去成爲盆氏漢有中郎將盆謐

賁

音奔

元和姓纂曰魯縣賁父之後晉有賁浦漢有郎中賁光晉又有汝南賁嵩清操之士又庾琛女適汝南賁氏又有長水校尉賁顥謹按後漢董憲將賁休舉蘭陵城降注前書有賁赫音肥今有此姓賁音奔是隋唐以來音變而有此

氏

昆吾

○案此條原本次孫陽氏後依廣韻移正

出自己姓高陽氏孫陸終生樊封於昆吾夏時昆吾爲伯
因以國氏

溫稽

○案此條原本次屯渾氏後依廣韻移正

出後魏書

孫陽

英賢傳曰秦穆公子孫陽伯樂善相馬其後氏焉漢侍御
史孫陽放卽其後

屯渾

元和姓纂曰太昊之佐屯渾氏其後爲氏

奔水

神農娶奔水氏女爲妃

二十四痕

恩

風俗通曰陳大夫成仲不恩之後爲氏

攷證案成仲不恩萬姓統譜作成恩

後燕有東庠祭酒恩茂

根牟

出自東夷根牟小國在琅琊陽都縣東之牟鄉春秋魯宣公九年取其國子孫氏焉六國時有根牟子著書見風俗

通

根水

世本老童娶根水氏女

古今姓氏書辨證卷七終

古今姓氏書辨證卷八

二十五寒

寒

姓書曰韓寒聲變因有寒氏考其實不然謹按春秋夏諸侯伯明氏之君曰后寒生子浞善讒后寒惡而棄之有窮后羿收浞而信使之以爲己相因以父字爲氏謂之寒浞殺羿而因其室生澆及豷則夏之中葉有寒氏成王封武王子於韓猶在數百年後則非聲變可知也前漢游俠傳有陝人寒孺卽后寒之裔也又後漢寒朗字伯奇一云朗姓寒非寒氏

韓

姓書校證最號詳備者如元和姓纂唐宰相世系表皆云
晉曲沃成師生萬食采韓原因以爲氏蓋用杜元凱左傳
注也謹按周武王庶子封爲韓侯幽平之後國滅而地入
于晉則萬宜出韓侯未必成師之子故顏師古注漢書曰
邗晉應韓武之穆也據如韓王信贊所云則韓萬先祖武
王之裔而杜預以爲出自曲沃成師未詳其說師古此注
最爲有理今宜用其意更之曰韓氏出自姬姓周武王庶
子封爲韓侯奄受追貊之戍以長北諸侯其地謂之韓城
春秋時晉韓原是也宣王中興韓侯能幹不廷方以佐王
大有功於周室王親命之賜之梁山以爲韓國之望平王
東遷子孫失國以國爲氏而地入于晉至曲沃武公并晉

有韓萬者爲戎大夫伐翼有功復封韓原以爲采地自是

韓氏始昌阜於晉萬字武子生定伯簡

○案杜預世族譜定伯簡萬之孫程

公說春秋分記萬子求伯求伯子簡此以簡爲萬子誤

字子豐子豐生子輿子輿生

獻子韓厥厥生穆子無忌及宣子起起代厥爲正卿起生

叔禽叔椒子羽須無須無代起爲卿謂之平子生簡子不

信字伯音其族人褐穿固箕襄邢帶及景子襄皆爲晉

大夫景子無忌子不信生莊子莊子生康子始與趙魏分

知伯之地康子生武子武子生景侯虔

○按史記趙世家索隱虔作虔始

與趙魏俱列爲諸侯景侯生烈侯烈侯生文侯文侯生哀

侯哀侯生懿侯懿侯生昭侯昭侯生宣惠王宣惠王生襄

王倉倉生太子嬰公子咎公子蟣蝨咎立爲釐王釐王生

烈惠王烈惠王生王安爲秦所滅而螽蟥生信漢封爲韓
王後與太子俱亡入匈奴至頽當城生子因名爲頽當韓
太子亦生子嬰至孝文時頽當及嬰率其衆降漢封頽當
爲弓高侯嬰爲襄城侯弓高侯傳子至孫國絕其孽孫嫪
貴幸嫪弟說擊匈奴封龍額侯子增嗣諡安侯生嗣侯寶
及河南尹騫寶無子國除成帝封增兄子岑爲龍額侯子
傳弓嗣而騫避王莽亂徙居赭陽九世孫術生純皆河東

太守純生魏司徒甫陽

按唐世系表甫陽作甫鄉○案魏志韓暨傳封南鄉亭侯甫南形似

陽鄉聲近因以致誤

恭侯暨六世孫延之字顯宗後魏魯陽侯孫瓌

平涼太守安定公生常州刺史演演生褒字弘業後周少
保三水正伯生唐戶部尙書仲良仲良生瑗字伯玉相高

宗武安韓氏弓高侯頽當裔孫尋後漢隴西太守世居潁川生司空稜字伯師其後徙居安定武安後魏有常山太守武安成侯耆字黃耆徙居九門生茂字元興尙書令征南大將軍安定王二子備均均字天德定州刺史安定康公生峻雅州都督生曹州司馬仁泰仁泰生叡桂州長史七子晉卿同州司法參軍李卿義王府胄曹參軍子卿陝州功曹參軍仲卿祕書郎雲卿禮部郎中

○案唐世系表作禮部侍郎

紳卿京兆府司錄升卿易州司法參軍仲卿生愈字退之唐大儒也吏部侍郎諡文公封昌黎伯從祀文宣王廟昌黎韓氏河東太守純四世孫安之晉員外郎二子潛恬恬二子都偃偃臨江令生後魏從事中郎穎穎生播字遠遊

徙昌黎棘城二子勵紹紹字延宗揚州別駕二子奕胄胄

字弘胤北齊膠州刺史生護字靈祐後周商州刺史護生

賢字思齊隋邵州刺史

案唐世系表邵州作鄧州

襲黃臺公賢生符字

節信唐巫州刺史符三子大壽大智大敏大智字不惑洛

州司戶參軍生偲祕書郎休字良士相明皇以骨鯁知名

善諫諍九子浩高陵尉洽

案唐世系表洽作治○案洽古閣本新唐書作治

監察

御史洪邢州長史澣郊社丞法諫議大夫滉字太沖相德

宗中書令晉國公生羣臯羣禮部員外郎臯字仲聞尙書

左僕射陽夏韓氏甫鄉恭侯暨之後徙陽夏望生垂垂生

弘充弘相唐憲宗子公武字從偃右驍衛上將軍檢校司

徒宣武節度使諡曰肅

案唐世系表宣武節度使諡肅者乃弘弟充此檢校上似脫充字

單

○案此條原本次寒氏後依廣韻移正

河南單氏後魏官氏志代北褐單氏可單氏並改爲單氏

案魏志褐作湯可作阿

丹

元和姓纂曰堯子丹朱之後爲氏漢有長安富人丹玉君

安

出自姬姓黃帝生昌意昌意次子安居于西方自號安息

國後漢末遣世子高入朝因居洛陽晉魏間家于安定後

徙遼東姑臧以避亂又徙武威河南安氏後魏代北安

遲氏改焉又安祿山本姓康其母阿史德爲覲居突厥中

禱於軋牢

攷證案唐書本傳作犂

山卽虜所謂戰鬪神者旣而妊及

生有光照穹廬野獸盡鳴望氣者言其祥范陽節度使張
仁愿遣搜廬帳欲盡殺之匿而免母以神所命遂字曰軋
牢山少孤隨母嫁狄將安延偃開元初延偃攜以歸國與
將軍安道買皆來得依其家乃冒姓安更名祿山其後賊
平肅宗以國賊讎惡惡聞其姓京師坊里有安氏者悉易
之

難

姓苑云百濟人姓

但

音亶

漢王莽傳西域焉耆先叛殺都尉但欽又姓苑有濟陰太
守亶巴近有黃州進士但氏自云其姓讀如去聲又音訛

爲淡

邗

河南邗氏後魏官氏志秘邗氏改焉

蘭

舊云出自姬姓鄭穆公方娠其母夢天使與之蘭旣生名之曰蘭及有疾刈蘭而卒子孫神之因以爲氏楚漢之前旣無此氏卽合止以漢史爲始

案漢書有武陵太守蘭廣

刊

出姓苑

韓餘

世本韓宣子餘子之後氏焉謹按春秋晉成公宦卿之餘

子以爲餘子蓋適子之母弟宣子韓起也

韓侯

元和姓纂曰周宣王錫命韓侯支孫氏焉

韓褐

英賢傳曰韓厥後趙肅侯大夫有韓褐胥居

邯鄲

會稽典錄度尚弟子邯鄲淳字子禮弱冠有異才作曹娥碑無所點定蔡邕題八字曰黃絹幼女外孫壘曰

安止

耿弇父況與王莽從弟俱共學老子於安止先生嵇康聖賢高士傳曰安止望之字仲都京兆長陵人少持老子經

恬靜不求仕宦號安止丈人成帝聞欲見望之望之不肯
見爲巫鑿隱於人間也

安國

漢南越王趙嬰齊娶繆氏女爲后后常與霸陵人安國少
季通及太子興立後爲太后武帝元鼎四年使安國少季
使南越諭王及太后入朝師古曰姓安國字少季

安陵

戰國策安陵纏楚王妃之父安陵小侯國也子孫氏焉

安是

英賢傳曰晉有安是叔施事晉厲公

安都

晉傳餘顧複姓錄有此氏

安遲

後魏安遲氏改爲安氏

蘭喬

元經傳曰匈奴四姓有蘭喬氏號曰逐世爲輔相

二十六桓

桓

孝慈淵聖皇帝御名胡官切從木從亘出自姜姓齊公小白之後以諡爲氏東觀記曰齊侯作伯支庶用其諡立族命氏焉紹興二年詔避諱之字曰亘音周旋之旋後漢太子太傅榮字春卿其先齊人自齊徙沛國龍亢榮生雍郁

郁字仲恩襲爵關內侯生白延俊豐良普傳爵至曾孫延
字叔元太尉陽平侯生衡順順生典字公雅光祿勳關內
侯良龍舒侯相生鸞字始春議郎子暉字文林又族人豐
生麟麟生彬字彥林尚書郎榮八代孫彝晉宣城內史生
雲溫豁祕冲冲荊州刺史豐城公生嗣謙脩脩晉護軍長
社侯過江居丹陽生尹尹生崇之崇之七世孫法嗣唐郁
王府諮議參軍生少府丞思敏思敏生彥範相唐中宗姓
書或云宋公禦說之後司馬離亦爲此姓誤矣離乃向氏
特宋之公族謹案左氏齊車右大夫桓跳卽榮之先

官

出姓苑

觀

出自妣姓夏王啟庶子一人食邑於觀謂之五觀其地洛
汭是也五觀之後爲諸侯有罪夏王滅之子孫以國爲氏
觀丁父仕都楚武王伐都浮丁父以歸使爲軍師故楚大
夫獨有觀氏而世掌太卜謂之卜尹觀起觀從觀瞻皆其
後也後漢中平四年有零陵人觀鵠自稱天平將軍

冠

○案此條原本列單
氏後依廣韻移正

列仙傳有仙人冠先

樂

出自姬姓唐叔虞之後靖侯孫賓食邑于樂因以爲氏其
地趙國平棘縣西北樂城是也賓生共叔共叔生貞子枝

枝生宣子盾盾生武子書書生桓子廕廕生懷子盈皆晉卿盈弟京廬及鍼糾樂魴弗忌豹六人皆爲大夫漢有尙書爰巴魏郡內黃人又春秋時齊惠公子雅生施字子旗亦爲爰氏

謹

出姓苑

歡

一作鄭則官反

海西先賢傳有漁陽人歡援字仲弓

瞞

風俗通荆蠻之後本姓蠻後世音訛遂爲瞞氏或曰本姓盤改焉左傳衛有司徒瞞成

潘

出自姬姓豫章潘氏南唐散騎常侍處常生內史舍人佑
今爲大族又潘一作番漢食貨志河東守番係欲

○案原本脫欲

字据食貨志補

省砥柱之漕師古注曰番音普安切

草

姓苑音潘謹按草棄糞器也

完顏

完顏昌仕金爲大興尹有文武材宣宗面勞之曰卿曾大
夫是開國元勲

二十七刪

關

風俗通云關令尹喜之後誤矣喜爲周函谷關尹蓋三代
官名國語言敵國賓至關尹以告是也漢藝文志有關尹
子師古曰名喜爲關吏老子過關喜去吏而從之

環

謹按周禮夏秋官皆有環人未必其後不爲氏姓纂獨取
環列之尹必有所據也

班

出自芊姓楚若敖之後秦滅楚鬬班裔孫遷晉代之間因
爲班氏

蠻

出自芊姓荆蠻之後春秋謂之戎蠻子亦曰蠻子亦其後

爲氏

顏

元和姓纂曰圈稱陳留風俗傳葛洪要纂皆曰出自顓帝
之後陸終第五子安爲曹姓周武王封其裔孫曹挾於邾
至邾武公字伯顏人謂顏公子孫因以爲氏王儉譜云案
志引王儉譜云顏氏出自魯侯伯禽支庶食采顏
邑因氏焉今王儉譜云之下不載儉語謹補之 未知儉
何所據今因圈葛二家舊譜爲定謹按顏邑不見於經傳
而邾婁顏公事見公羊傳魯公自爲家譜亦以邾言其近
也邾近而人多事魯故魯大夫有顏莊叔及鳴高齊亦近
邾國其大夫有顏庚字涿聚及其子晉

關龍

元和姓纂曰夏桀時關龍逢之後誤矣龍逢姓關莊子言
龍逢剖卽其名也後無複姓

駢臂

商瞿傳瞿傳易于駢臂子弓徐廣曰子弓楚人駢臂氏也
二十八山

山

風俗通云晉有山祁爲七輿大夫賈執姓氏譜河南五姓
其一山氏

間

解見簡氏

簡

音間

漢淮南厲王傳曰王與故中尉簡忌謀殺反者開章以閉口師古曰姓簡名忌簡音奸嚴助作間字音同今流俗本此簡氏或作簡者非也蓋後人所改然則簡間其本一也

間音

史記濟南間氏宗人三百餘家豪猾二千石不能制景帝使郅都盡誅之

古今姓氏書辨證卷八終

古今姓氏書辨證卷九

下平聲

一先

先

出自晉公族先氏世爲晉卿大夫所謂欒卻狐先者也春秋時有先蔑先都先辛皆以姓名見其尤顯者曰原大夫先軫生霍伯先且居且居生先克三世爲卿

阡

唐中和二年邛州牙官阡能因公事違期避杖亡命爲盜捕盜使楊遷誘之能自出首而遷誣以擒獲被刑甚酷遂罵楊遷發憤爲盜衆數千人十一月陳敬瑄命高仁厚爲

招討使仁厚用謀者破平之邛州又捕能叔父行令等敬瑄釋之

天

黃帝之相有天老後以爲氏元和姓纂曰莊子有天根注云人姓名謹接近世解注莊子多寓言而天根非人今依姓纂

賢

出姓苑

弦

出自古子爵小國在光州弋陽軟縣東南春秋魯僖公五年楚滅弦弦子奔黃以國爲氏齊有弦多衛有弦施

案弦施亦

齊臣此作衛蓋以哀公四年齊陳乞弦
施衛甯跪救范氏遂悞以弦施爲衛人

燕

出自姬姓周同姓大臣召公奭爲武王成王太保封於北
燕傳國四十二世至王喜爲秦所滅當春秋初燕地小常
爲山戎所侵子孫出仕中國以國爲氏或云南燕姑姓之
後其國先亡因以爲氏孔子弟子有燕伋字子思漢有宜
城侯燕倉唐有直臣燕欽融元和姓纂曰弘農燕氏廣漢
燕氏皆漢以來自范陽徙居者唐百濟大臣八姓其一曰
燕氏餘乃沙弋解真國苗木七氏也

田

出自媯姓陳厲公生公子完避禦寇之亂奔齊以國爲陳

氏齊桓公使爲工正食采於田八世孫常擅齊政爲強家

始稱田氏或云陳田聲相近也常曾孫曰和始篡齊爲諸

侯和生午午生威王嬰齊又四世而秦滅齊虜王建建弟

假及儋

案王建弟惟假一人若儋市等皆齊王疏族此作建弟假及儋未詳所本

儋子市從弟

榮弟橫儋子廣項羽時並裂地稱王漢興諸田徙陽陵又

徙北平太尉武安侯蚡大鴻臚廣明大司農延年皆其後

魏議郎疇

字子泰二十四世孫璟

案唐世系表作二十二世

唐鄭州司

馬生承嗣

案唐世系表璟生守義守義生承嗣此缺一代

其孫弘正爲司徒

宏正案

止檢校司徒此經云爲司徒誤

中書令子布魏博節度使又有望出平涼

京兆雁門太原天水信都者世系具元和姓纂

案姓纂今缺

又

後漢益州掾田恭能譯夷人語屯田長史田賊戰沒田汜

逐虜被殺晉有羅尙督護田佐後蜀尙書田褒西涼鎮軍將軍西郡太守田昂昂兄子承愛南涼博士祭酒田元冲後周賜雁門公田弘姓紇干氏隋初復舊立孫正幹河
南田氏壽安田瑜字資中龍圖閣直學士右諫議大夫有傳生齊卿真卿漢卿彥卿輔卿福昌田晉揚州刺史生供奉官謚謚生國子博士祐興祐興生光祿卿棐有傳棐生陝州閿鄉簿伸 淄州田氏鄒平田敏太子少傅致仕生殿中丞章太中大夫宗顯生奉議郎綱及照綱生疇疇生文明字德普照生迪功郎俊民俊民生延慶字祖洽並宣和六年進士 范陽田氏京兆尹永興軍節度使贈侍中重進有傳生六宅使守信供奉官閤門祇候守吉守信生

殿直保和保正

潁川汝陰田氏號州團練使令方生郢

州團練使欽祚有傳欽祚生供奉官閤門祇候承誨崇儀

副使承說承誨生閤門祇候紹忠

并州太原田氏檢校

太傅左驍衛上將軍景咸有傳生漢明補供奉官使嶺表

卒

易州田氏紀生成象成象生後唐泰州牧行方行方

生再遇再遇生敏字子俊儀州防禦使有傳生瑾琳壽璋

瑀瑾生文思副使守度守度生琳琳生灝紹聖四年進士

壽供奉官生內殿崇班守琪內殿承制守中供奉官守畏

守道守中生澄城簿槩璋生角瑀生希古希道希崇

汾

州田氏左領軍衛大將軍康州團練使

案宋長興間有田紹斌汾州人累官

康州團練使此脫名當卽此人

有傳生守信內殿崇班閤門祇候

兗州

瑕丘田氏水部員外郎昭度生殿中丞穀穀生太常博士植

顛

春秋晉大夫顛頡之後

牽

安平牽招爲袁紹子尙從事降曹操曹操遣招詣柳城慰撫烏桓其後操梟尙首令三軍敢有哭之者斬招獨設祭悲哭操義之舉爲茂材又祖約有將牽騰

淵

姓源韻譜曰出自高陽氏才子八人其一曰蒼舒謚淵後以謚爲氏

邊

出自子姓漢有邊韶字孝先南京輔國司馬邊憲西秦鎮遠長史邊芮五代江南將邊鎬其後子孫或居楚北或居

陳留

縣

平聲

聖祖上一字嫌名其字與縣邑之縣字同而平聲或從心

魯大夫有賁父及子瑣二人孔子弟子有賁字子象

案孔

子縣直父字子象見廣韻注直索隱作豐家語無父字此作賁疑卽直字之訛又有縣子成字子祺家語作子橫亦

孔子弟子今詳此本以垂挂爲義而姓書未有言其所自出竊

意古者天子宮懸諸侯軒懸必有樂師掌其事者以世官

爲氏又古者男生必垂桑弧于門以射天地四方周官治

象刑象之法必垂之象魏浹日而歛之故莊子謂之縣令
此二事亦恐有因而得氏者然則賁父子瑱亶成芝點六
人者其氏宜音平聲無疑矣近世姓源韻譜元和姓纂皆
以此氏入去聲音黃練切誤也今改正止入先韻去聲三
十三霰更不收

先穀

元和姓纂曰晉先穀之後氏焉謹按春秋先穀食原莚二
邑爲卿故曰原穀又曰莚子

先賢

漢匈奴單于從兄日逐王先賢揮降元帝時封歸德侯謚
靖生陽侯富昌富昌子諷諷子襄襄子霸皆嗣師古曰揮

音纏

千乘

謹按千乘邑名也其先食邑者因以爲氏

涓濁

元和姓纂曰呂氏春秋夏首人涓濁梁善畏明失氣而卒
謹按荀子濁作蜀或恐濁梁姓涓而非複姓

二仙

鮮

元和姓纂曰鮮于氏之後或單姓鮮蜀李壽司空有鮮思
明

錢

出自顯帝曾孫陸終生彭祖彭祖孫孚爲周錢府上士

因官命氏焉戰國時有隱士錢丹秦御史錢產居下邳西

京雜記會稽人錢勃勞苦故人朱買臣遺與紈扇買臣爲

太守至郡引爲上客漢哀平間錢襄爲廣陵太守避王莽

亂徙居烏程生晟又東晉青州刺史端厯陽太守鳳字世

儀所謂精神滿腹者裔孫樂之宋太史令

○案原本太史
訛太守據宋天

文志

居長城故又望出吳興宋吳越錢氏杭州臨安鏐鐸

鉢鋸鏐鏐爲吳越國王諡武肅子元瓘嗣諡文穆子弘佐

嗣諡忠獻弟侑嗣國人廢之以弟叔嗣叔舉十三州歸于

有司徒封淮南王守太師尚書令兼中書令贈鄧王諡忠

懿

然

出自姬姓鄭穆公蘭十一子其一曰子然子然之孫丹字子革奔楚爲右尹以王父字爲氏

延

後漢有公孫述將延岑又有京兆尹延篤謹按吳公子札食采延陵及州來左傳稱延州來季子則已去陵稱延延氏宜出於此又後魏可地延氏亦改爲延氏

連

元和姓纂曰齊大夫連稱後今泉州有連氏望出馮翊又河南連氏五代史福建僞閭門使連仲遇

攷証案連仲遇萬姓統譜作連

爲控
鶴使

偏

元和姓纂曰古有偏將軍急就章亦有偏姓卽其先爲偏將軍以官爲氏

便

姓書云漢少府便樂成望出魯國誤矣謹按霍光傳故長史任宣謂霍禹曰使樂成小家子也得幸大將軍至九卿封侯師古曰使姓也字或作史然則使史通用而姓書誤其字畫以使爲便也

綿

元和姓纂曰晉大夫食采綿上子孫氏焉謹按孟子時有高唐人綿駒善歌者卽其後又河南綿氏後魏官氏志爾

綿氏改爲綿氏

全

吳大司馬全琮居吳郡錢塘五代時蜀將全師都卽其後
又蜀賊取文州刺史全師雄爲帥登州蓬萊全氏駕部
郎中元忠生濤濤生化之化之生居易

泉

本姓全氏全琮孫暉封南陽侯食封白水改爲泉氏後魏
巴人泉企爲洛州刺史上洛侯故望出上洛遼東泉氏
唐高建武爲高麗王時有益蘇文者姓泉氏自云生水中
以惑衆父爲東部大人對盧蓋蘇文嗣立殘凶不逞弑
其王建武更立建武弟之子藏爲王自爲莫離支專國莫

離支猶唐兵部尙書中書令蓋蘇文死子男生代爲莫離
支與弟男建男產相怨高宗平高麗授男產司宰少卿男
生右衛大將軍投男建黔州男生有傳

宣

風俗通曰宋宣公之後以諡爲氏後漢馮翊雲陽人宣秉
字巨公爲大司徒司直光武曰楚國二龔不如雲陽宣巨
公子彪官至立苑太守又晉彭城令宣聘望出陳郡元和
姓纂曰魯叔孫宣伯之後誤矣宋宣公舍其子與夷以國
授其弟穆公君子謂之知人叔孫宣伯以淫罪奔齊魯人
盟之曰無或如叔孫僑如欲廢國常蕩覆公室僑如不自
安又自齊奔衛而子孫無仕諸侯顯者其後必不爲氏謹

按漢功臣表南安莊侯宣虎以重將破賊荼侯九百戶生
共侯戎戎子千秋以罪免元康四年虎曾孫南康簪裊護
詔復其家又土軍武侯宣義以廷尉擊陳豨侯千一百戶
生孝侯相如案漢書相如作莫如○案史記亦作莫如此作相如誤相如生康侯平
平生侯生虎義皆宋宣公後巨公之先也

翽

出姓苑

船

集韻曰人姓

顓

元和姓纂曰出自顓帝之後或顓臾之後以國爲氏

歆

元和姓纂曰顓孫之字或作歆誤謹按此氏必魯大夫歆孫之後歆孫乃生搏宋萬者

貞

見上平聲宋陵州仁壽貞安字太子中允弟安輿屯田貞外郎

虔

出自黃帝之子得姓者十四人其一曰虔氏

案國語胥臣曰黃帝之子

二十五宗其得姓者十四人爲十二姓姬酉祈已膝蒧任苟嬉姑嫫依是也惟青陽與夷鼓同已姓又云青陽與蒼林爲已姓則十四人中並無虔氏

騫

出自閔氏魯閔損字子騫爲孔子弟子其孫文以王父字爲氏後漢質帝時有騫宏字弘伯避地昆吾爲金城別駕封金城侯子孫因家焉裔孫彊晉將軍平陽郡太守二子白昊白四世孫敬字宗之後魏奉朝請金城郡守尙書庫部郎中一子成裔孫行本唐靈州都督長史彊五世孫威後魏鄯州刺史隰城公會孫直唐華州長史生味道相武后味道生慎金辭玉公肩

權

出自子姓商王武丁之裔孫封於權邑其地南郡當陽縣權城是也楚武王滅權遷其國於那處子孫以國爲氏秦滅楚遷大姓於隴西而權氏始居天水漢左輔都尉忠十

四世孫翼字子良爲後秦右僕射安止恭公生宣襲後秦
黃門侍郎六世孫榮隋儀同鄜城公生文誕常州刺史平
涼公生崇本曾孫德興案唐世系表曾孫作玄孫字載之相唐憲宗有
傳元和姓纂以鬪緡之後爲權氏誤矣楚嘗使緡及鬪敖
尹權而皆叛未嘗爲氏又唐開元梓州刺史權若訥有集
十卷

拳

春秋時衛大夫拳彌其先以地爲氏

鄆

謹按春秋釋例鄆鄭地也其先以所食邑爲氏楚鄆將師
衛鄆武子盱皆爲大夫姓書未有此氏今增入

媯

姓解曰漢有媯說誤矣漢弓高侯韓頽當孽孫曰媯爲武帝嬖臣其弟說封案道侯乃二人名非人姓也

鮮于

出自子姓商父師箕子佯狂避紂爲周武王陳洪範武王封之朝鮮支子仲食采於于因合鮮于爲氏唐貞觀所定高陵郡五姓其一曰鮮于氏藝文志有鮮于向集十卷後燕翟真司馬鮮于乞翟成司馬鮮于得後趙將軍鮮于亮

鮮陽

案此與下鮮虞條原本次焉耆氏後依廣韻移正

元和姓纂曰漢有揚州刺史鮮陽進

攷證案鮮陽進萬姓統譜作解陽進其

孫滔散騎常侍

鮮虞

出自春秋時鮮虞小國其地今中山是也晉伐鮮虞滅之
子孫以國爲氏

延陵

出自姬姓吳王壽夢少子札食邑延陵後世以邑爲氏元
和姓纂曰趙襄子有謀臣延陵正卽其後謹按宋謝晦兵
敗而走左右皆棄之唯延陵蓋追隨不捨文帝以蓋爲鎮
軍將軍

延州

元和姓纂曰吳季札封延州來因氏焉誤矣延延陵也與
州來爲一邑後世無以延州爲氏者

宣于

姓苑曰前趙錄劉元海有太史令宣于修之

顓臾

出自風姓之後封爲附庸國於濟水之上司伏羲太皞祀者以國爲氏

顓孫

風俗通陳公子顓孫仕魯因氏焉其孫顓孫師字子張爲孔子弟子生申祥娶子游之女

顓頊

下字犯廟諱古高陽氏帝號後世以爲氏神仙傳有太原女顓頊和

攣鞬

漢匈奴傳單于姓攣鞬氏師古曰攣力全反鞬丁奚反

焉耆

上音咽
下音支

西域人本焉耆部爲國後以國姓

古今姓氏書辨證卷九終

古今姓氏書辨證卷十

三蕭

蕭

出自子姓商王帝乙庶子微子啟周封爲宋公弟仲衍人
世孫戴公生子衍字欒父裔孫大心平南宮長萬有功封
於蕭以爲附庸今徐州蕭縣是也子孫因以爲氏其後楚
滅蕭裔孫不疑爲楚相春申君上客世居豐沛漢有丞相
鄧文終侯何三子祿貴則案漢書何子二人祿延生遺
及則則子慶此作何三子祿貴
則則生彪未詳所本○案貴富爲遺之譌唐世系表云何
二子遺則則生彪與漢書亦異此本唐表又據漢書以祿
嗣侯故云何則生彪字伯文諫議大夫侍中以事始徙蘭
陵生章公府掾章生仰字惠高生皓皓生望之御史大夫

徙杜陵生育光祿大夫生紹御史中丞復還蘭陵生閔光
祿勲閔生闡濟陰太守闡生永吳郡太守冰生苞後漢中
山相生周博士周生矯蛇正長矯生達州從事達生休孝
廉沐生豹廣陵郡丞豹生裔太中大夫生整字公齊晉淮
南令過江居南蘭陵武進之東城里三子雋鏐烈苞九世
孫卓字子略洮陽令女爲宋高祖繼母號皇舅房卓生源
之字君流徐兗二州刺史襲封陽縣侯生思話郢州都督
封陽穆侯六子惠開惠明惠基惠休惠朗惠禧惠齊尙
書生介字茂鏡梁侍中介生引字敬休陳吏部侍郎引生
德言唐祕書少監德言生沈太子洗馬沈生安節相王兵
曹叅軍安節生至忠元嘉廣微至忠相中睿二宗生衡衍

隨齊梁房整第二子鍇濟陰太守生副子州治中從事生

道賜宋南臺治中侍御史三子尙之順之崇之順之字文

緯齊丹陽尹臨湘懿侯十子懿敷衍暢憲宏偉秀愴恢衍

梁高祖武帝也號齊梁房懿字元達長沙宣武王七子業

藻象猷朗軌明明字靖通梁貞陽侯曾孫文憬湖州司馬

生元祚元禮元祚萍卿侯生司勳員外誠汝州刺史諒諒

生給事中直直生策節革革邵州刺史生嶰○案唐世系表作解鄴

峴嶰字應之鄴字啟聖○案唐世系表本傳俱作啟之相唐宣宗五子○案

唐世系表晏字季平滉字文度昌字光祥黯字中蘊曉○案

唐世系表字象文○案唐世系表尙有翥字文舉元禮湘州刺史生譏諼詮

纂梁高祖武皇帝八子統綱續繹綜續綸紀統昭明太子

綱簡文帝統五子歡譽譽譽後梁宣帝生歸岌巖岑
歸後梁明帝生琮璟琢珣瑀琮隋葛國公璟祕書監琢晉
陵王珣南海王瑀字時文相唐高祖太宗珣生鉅鈞鉅生
唐銀州刺史嗣德鴻臚少卿瑯琊郡公嗣業鈞太子率更
令生灌字元茂唐渝州長史灌生絳州刺史仲豫及嵩嵩
相明皇生華悟衡華相肅宗生殿中侍御史常常生俛字
思謙相穆宗悟大理司直生倣字思道相僖宗倣生給事
中廩字富侯廩生須益頴須生愿後唐太子賓客益生灌
○案唐世系表無此人渝州長史灌
乃益五世祖益子不當同名恐有誤
廣南相入朝爲屯田
員外郎衡太僕卿駙馬都尉生戡復巽升鼎復字履初相
德宗生儉湛儉生騫字鵬舉湛生寘宥寘相懿宗生邁邁

邁字得聖相僖宗邁字昌聖瑀生銳錯銳駙馬都尉太常卿錯虞部郎中鉞給事中鉞生恕虢州刺史恕生定字梅臣唐史稱蕭氏自瑀至邁八葉宰相以爲盛族謹按春秋左氏傳成王分魯公伯禽以商民六族一曰蕭氏其後無聞契丹蕭氏晉開運末耶律德光北歸以蕭翰爲宣武節度留守東京翰契丹呼爲國舅及將授節鉞李崧爲製姓名曰蕭翰自是始姓蕭而蕭氏女世爲契丹后云

貂

齊寺人貂之後今望出渤海

案後漢書陽嘉四年初聽中官得以養子爲後周時不應

有此風俗通引貂勃爲近是

刁

姓書云刁貂聲同而字異本一姓也蜀有刁達後燕有刁雲

周

晉載記石遵有將軍周成姓書未有此氏今增入

條

漢孝平時安城太守程君緡娶渤海條真女程邈作姓氏

譜云條氏商賢人之後是也

案左傳周分魯公殷民六族有條氏

趙石虎有

太常條枚爲太子傅

調

周禮調人之職掌司萬民之難而和合之其世官者氏焉

聊

風俗通有漢侍中聊倉著書號聊子又漢有潁川太守聊

謀

攷證原本謀訛子據漢書改

著萬姓譜子孫因官爲族望出潁川

遼

出姓苑又魏將軍牛金避司馬氏難嘗改姓遼氏至後周工部尙書遼允始復爲牛氏

堯

帝堯之後以謚爲氏世居上黨長子後魏大司農堯暄徙居岐州生宗宗兄子雄北齊驃騎將軍又隋鷹揚郎將堯君素魏郡湯陰人

鄆

趙大夫食采於鄆因以爲氏今深州阜城卽其地也

案史記孔

子弟子有鄒子單
字子家當卽其後

四宵

蛸

出自蕭氏南齊武帝改巴東王子嚮氏曰蛸貶之使同於

蟲類也

朝

讀朝暮之朝

舊無此姓姓解曰紂臣有朝涉不勝其誤謹按邵意以謂
斲脛者朝姓而涉名豈知乃晨涉水者紂斲其脛見淫刑
之甚不可謂之人姓名也今駁去

晁

出自史氏衛卿史朝之子曰文子苟苟子以王父字爲氏

朝通於晁故後世有晁氏或云蔡朝吳後亦作晁氏漢御史大夫錯卽其後

朝讀朝廷之朝

出自姬姓蔡仲裔孫曰文侯申生子朝子朝生聲子公孫歸生字子家生吳以王父字爲氏所謂蔡朝吳者

○案襄二十六年

傳蔡太師朝吳陸音如字廣韻亦入陟遙切下是朝吳之朝本不音潮漢書晁錯本傳作鼂錯鼂卽朝之借字楚辭哀郢甲之鼂吾以行王逸云鼂旦也漢書嚴助傳鼂不及旦馬融長留賦埜雉鼂雖皆以鼂爲朝說文引杜林亦以爲鼂旦字古無四聲輕重之別後世始以朝暮與朝廷兩讀其實鼂錯卽朝錯也晁亦鼂之異文

鼂虛嬌切

世本曰元鼂之後

譙

舊姓書云出自姜姓武王克商下車封神農之後於譙以國爲氏或云姬姓曹伯食采於譙皆誤矣謹按曹伯自文王子振鐸始封至伯陽而滅焦地未嘗在其封內春秋時有二焦一在陳而近楚魯僖公二十五年楚成得臣取焦是也一在晉而近秦魯宣公二年楚師圍焦晉趙盾救焦是也陳之焦宜爲神農苗裔所封而晉之焦在河外乃召公奭子焦侯之舊國故晉司馬侯對平公曰虞虢焦滑霍揚韓魏皆姬姓也晉是以大武獻以下兼國多矣蓋自晉獻公時焦已在晉其後惠公重賂秦以求入許以河外列城五杜預以二城乃焦瑕三城闕後十五年鄭人燭之武說秦伯曰許君焦瑕朝濟而夕設版焉又四十年當魯宣

公二年則秦圍焦而楚滅之百餘年間在晉之焦三見于傳則姬姓焦侯之後明而可據如曰神農之後則又不可不辯也何以知之晉武王封黃帝之後於薊封神農之後於焦雖有其事而實無受封之人考諸經史可驗者五事史記云炎帝失德黃帝與戰于阪泉之野滅之遂有天下則神農氏亡矣自黃帝及商更數千年不聞其後有達人一也初爲杞侯者曰東樓公初爲宋公者曰微子初爲陳侯者曰胡公媯滿炎帝之後獨無姓名二也薊之地後入于召公之北燕焦之地後入于陳足見無人可立國亦隨除三也周初以杞爲二王後又封陳以備三恪三恪以恭奉先聖爲義蓋武王封建之法非帝王舊制也使炎帝之

之後有人必增三恪以爲四矣四也孔子謂武王興滅國
繼絕世天下之民歸心焉蓋下車之初凡三皇五帝二王
之後有國者存之滅者興之絕者繼之此盛德之事也至
求其後裔而不復可見蓋亦收其爵土改命賢者以爲諸
侯宛如後世褒錄名賢而不幸無後則已行之命當閣而
不下史臣書其事以見前之詔令不爲無恩而一旦追寢
非獲已焉五也舉是五事則姜姓焦國本無其人姬姓焦
侯正爲得氏之始唐人李利涉載其說於盛氏譜中雖略
而可采今參合援引以定著譙氏譜云謹按譙氏出自姬
姓召康公奭輔周成王爲西伯夫人姜氏出游池上見二
黑龍交歆然不樂遂有娠及生子有文在其手曰盛因名

而氏之年十有八封爲譙侯其地譙國焦縣是也後裔寢微至晉武公偁起曲沃并晉稍吞滅諸鄰國始并焦而有其地子孫因以爲譙氏亦作焦譙焦一也魏有譙周晉梓潼太守譙登高涼將譙朗及明折衝長史譙昶後涼呂纂將譙辯後蜀李壽聘處士譙秀以爲賓客

焦

解見譙氏

椒

元和姓纂曰楚大夫越椒之後椒鳴誤也謹按春秋越椒者若敖之後而伍參之子伍舉謂之椒舉舉之子曰椒鳴是伍參之祖父有字椒者而舉以王父字爲氏不然則椒

邑以邑爲氏特史失其傳非越椒之後有椒鳴也今宜曰
出自伍氏伍參之子舉以王父字爲椒氏

饒

出自六國時齊大夫食邑於饒者趙孝成王四年拔其邑
以封其弟長安君齊之故臣以邑爲氏姓苑曰臨川人漢
有魯陽太守饒威因家焉又吳志襄陽饒助之後徙居永
安謹按徐廣注史記曰饒屬北海又曰饒陽在河間然則
北海之饒宜爲得氏之始

搖

後漢岑彭傳更始遣將軍搖偉鎮淮陽注風俗通曰東海
王搖句踐之後其後以搖爲姓

○案搖今本漢書引風俗通作搖廣韻引作搖東海

俱作東越徭徭通用後搖氏條注云勾踐之後東越王搖子孫以王父字爲氏然則徭搖一也

繇

後漢鄧暉傳太守歐陽歙教曰西部督郵繇延天資忠正秉性公方云云注曰繇姓咎繇之後

鈔

姚音

其先姚姓避難去女從金潁川邾縣鈔氏漢桂陽太守猛生衛尉安成侯期期二子葛陵侯丹建平侯統丹生舒舒生羽羽生蔡皆嗣侯謹按唐以前鈔字未有音姚者漢李廣傳注曰刁斗形如鎗師古曰鎗卽鈔也音姚今俗或呼銅鈔玉篇亦曰鈔溫器也七昭切自唐人作廣韻始音掉

案廣韻原有餘昭徒弔兩切

蓋方言音變所致而今人沿習久誤不可

復改因考安成侯之氏詳著其說

姚

出自虞帝生於姚墟因以爲姓春秋時鄭大夫姚句耳姚般卽其後初陳胡公滿封於陳裔孫敬仲奔齊爲陳氏又爲田氏齊亡居魯至王莽封田豐爲代睦侯以奉舜祀豐子恢避莽亂過江居吳郡改姓爲矯五世孫敷復改姓姚居吳興武康敷生信吳選曹尙書八世孫僧坦隋開府儀同三司北隆公二子察最察隋太子內史舍人龔公生思廉左散騎常侍修文館學士豐城康男生豫州司戶參軍澄符寶郎憚澄字處李生璫琿璫字令璋相武后琿戶部尙書最蜀王友生思聰至八世孫衮唐太僕主簿 陝郡

姚氏亦出自武康梁有征東將軍吳興郡公宣業生安仁

隋汾州刺史生祥隋懷州長史檢校函谷都尉祥生懿字

善意雋州都督文獻公生元景元之元素元景潭州刺史

元之名崇相武后中宗睿宗明皇世稱姚梁公生鄧州刺

史彝大理卿昇永陽太守弈元素宗正少卿生楚州刺史

弇通事舍人馬

○案唐世系表作馮

臨陵令算孫九人曾孫二十人

四世孫七人五世孫五人彝生闔闔閔闔昇生閔閔閔

弈生闔闔生係侯闔生倍倫闔生侑伋闔生侑偕闔生恃

案唐世系表恃作倖

悟愴惇惕閑生恬澄闔生恒協恂

○案唐世系表闔六子恒

愴協恂

其顯者侑之子勉爲諫議大夫元素五孫三曾孫

○案上云算孫九人算元素子也此處復云元素三曾孫與上不相蒙疑有脫誤

弇生潤州司戶

叅軍閑睢陽太守右金吾將軍閭馬生閭論算生閭閭子
祕書監合世所謂姚武功者

搖

句踐之後東越王搖子孫以王父字爲氏漢功臣表海陽

侯搖無餘本越將以都尉擊項籍封千七百戶諡齊侯

案漢書

書作齊信侯此脫一字

子哀侯昭襄生康侯建建生襄侯省

案漢書功臣表

襄侯省作哀侯省

六世孫不更未央生賢爵關內侯世居餘杭

韶

出姓苑今開封有此姓望出太原

昭

出自芊姓楚昭王熊軫有復楚之大功子孫蕃衍以諡爲

氏與舊族屈景皆爲楚大族戰國策有昭衍昭過昭奚恤皆楚大臣

招

謹按春秋陳侯之弟招殺陳世子偃師楚人討而執之放之于越其後以王父字爲氏

案通志晉步招之後以名爲氏漢大鴻臚招猛

苗

出自芊姓楚若敖娶邲女生鬬伯比伯比生子文子良子良爲司馬生越椒字伯棼以罪誅其子賁皇奔晉晉侯使食苗邑爲大夫以苗爲氏其地河內軹縣南苗亭是也望出上黨者唐侍中太保韓國公晉卿祖襲夔始居長子晉卿四世孫璘泗州防禦使靜江統軍璘生延祿字世功南

唐檢校司徒行右千牛將軍五子全厚全瞻全節全义全
晦 宋上黨苗氏知麟州京生授字受之殿前副都指揮
使保康軍節度使檢校司空有傳生履管軍節度使累與
邊郡有傳 潞州壺關苗氏後徙符離太常少卿植生中

奉大夫正倫正倫生時中字子居左朝散大夫寶文閣待
制守戶部侍郎有傳 開封苗氏太師繼宗生武功大夫

允元允元生武功大夫仲淵仲淵生豐政和五年進士

常州苗氏工部員外郎因生推官祐之祐之生縣令兼兼
生元裔宣和六年進士 建康苗氏諒生忠恕忠恕生伯
達伯達生昌言紹興十二年進士又有光祿卿苗振國子
博士苗象中如京使苗忠

要

唐李懷光妹壻要廷珍守晉州以州降馬燧

喬

漢太尉立五世孫勒後魏平原內史從孝文入關生朗朗生達後周文帝命去木爲喬氏義取高遠也今望出太原達喬孫琳相德宗

橋

史記魯人有橋桃

案今史記及單行系隱桃俱作姚

畜牧塞上馬牛千

匹粟以萬鍾計又

國睢陽橋氏成帝時大鴻臚仁字季

卿從同郡戴德學著禮記章句四十九篇號橋君學五世

孫基廣陵太守生肅東萊太守肅生太尉立字公祖晉有

蜀人橋贊以李雄謀告張淳

僑

僑極之後

朝臣

○案此條原本次昭武氏後依廣韻移正

元和姓纂曰日本國使臣朝臣真人長安中拜司膳卿同正副使朝臣大父拜率更令同正朝臣姓也謹按日本傳其王文武遣朝臣真人粟田獻方物朝臣真人者猶唐尙書也開元初粟田復朝貢從諸儒授經詔四門助教趙元默卽鴻臚寺爲師其副朝臣仲滿慕華不肯去易姓名曰朝衡歷左補闕儀王友多所該識久乃還天寶十二載朝衡復入朝

昭涉

漢功臣表有平州共侯昭涉掉尾以擊臧荼功侯千戶生戴侯種種生懷侯它人它人生孝侯馬童馬童子昧失侯元康四年掉尾立孫涪不更福詔復其家

昭武

唐西域康國後名康居國其王始居祁連北昭武城爲突厥所破南依蔥嶺卽有其地支庶分王曰安曰曹曰石曰米曰何曰火尋曰戊地曰史世謂九姓皆氏昭武顯慶時以阿濫爲安息州以其王昭武殺爲刺史襲斤爲木鹿州以其王昭武閉息爲刺史以米國爲南謚州授其君昭武開拙爲刺史何國爲貴霜州授其君昭武婆達地爲刺史

史國爲佉沙州授其君昭武失呵

○案唐書作阿形相近

喝爲刺史

舊史云支庶皆以昭武爲姓示不忘本也

僑陳如

南史婆利國王姓僑陳如自古未通中國梁天監中遣使朝獻僑陳如者本天竺婆羅門晉末爲扶南國王其子闍黎邪跋遂以僑陳如爲號因姓氏焉

古今姓氏書辨證卷十終



